
একক ২(খ) □ রাশিয়াতে ১৯০৫ ও ১৯১৭ সালের বিপ্লব

গঠন

- ২(খ).০ উদ্দেশ্য
- ২(খ).১ প্রস্তাবনা
- ২(খ).২ প্রারম্ভিক কথা
- ২(খ).৩ তৃতীয় আলেকজান্ডার : স্বৈরাচার ও শিল্পায়ন : ১৯০৫ সালের বিপ্লবের পরোক্ষ কারণ
- ২(খ).৪ অঙ্কুরিত শিল্পায়ন : পরিবর্তনের নতুন বীজ
- ২(খ).৫ দ্বিতীয় নিকোলাস : স্বৈরাচারী স্থিতিশীলতা ও শিল্পায়িত পরিবর্তনের দ্বন্দ্ব : ১৮৯৪-১৯১৭
- ২(খ).৬ সোশ্যাল ডেমোক্রেটদের উত্থান
- ২(খ).৭ ১৯০৪-০৫ সালের রুশ-জাপান যুদ্ধ : বিপর্যয়ের ঘনীভবন
- ২(খ).৮ ১৯০৫ সালের বিপ্লব
- ২(খ).৯ সাংবিধানিক সংকট
- ২(খ).১০ ১৯১৭ সালের বিপ্লব
- ২(খ).১১ লেনিন ও বলশেভিক দলের উত্থান
- ২(খ).১২ ১৯১৭ সালের মার্চ বিপ্লব : জারতন্ত্রের পতন
- ২(খ).১৩ ১৯১৭ : মার্চ থেকে নভেম্বর : বলশেভিক বিপ্লবের প্রস্তুতি পর্ব
- ২(খ).১৪ লেনিনের আগমন ও নভেম্বর বিপ্লব
- ২(খ).১৫ নভেম্বর বিপ্লবে লেনিনের ভূমিকা
- ২(খ).১৬ সারাংশ
- ২(খ).১৭ অনুশীলনী
- ২(খ).১৮ গ্রন্থপঞ্জী

২(খ).০ উদ্দেশ্য

ইতিহাস পাঠের উদ্দেশ্য অতীতকে জানা, অতীতকে জেনে বর্তমানকে বোঝা আর বর্তমানকে বুঝে ভবিষ্যতের গतिकে একটি সুপরিবর্তিত কর্মসূচির মধ্যে আনা। এই উদ্দেশ্য নিয়েই আমরা বিংশ শতাব্দীর রাশিয়ার দুটি বিপ্লবের ইতিহাস পড়ব—একটি বিপ্লব হয়েছিল ১৯০৫ সালে। এটি আপাতভাবে একটি ব্যর্থ বিপ্লব। অন্য বিপ্লবটি হয়েছিল ১৯১৭ সালে—এটি পূর্ণাঙ্গভাবে একটি সার্থক বিপ্লব। বিপ্লব ইতিহাসে নতুন নয়। যখনই কোন রাষ্ট্র বা সমাজব্যবস্থা পরিবর্তনের সঙ্গে সামঞ্জস্য রাখতে পারে না, অস্তিত্বের আত্মপ্ৰাণিতে জর্জর হয়, তখনই তার ভেতরের পরিবর্তনকামী রুদ্ধ প্রাণশক্তি বিপুল উন্মাদনায় ফেটে পড়ে—পরিবর্তন আনে সমাজে ও রাষ্ট্রে। রাষ্ট্রবিপ্লব আসে মূলত সহিংস পথে কারণ রাষ্ট্র ক্ষমতার হস্তান্তর সচরাচর সরল প্রক্রিয়া হতে চায় না। অবশ্য বিনা রক্তপাতে রাষ্ট্র বিপ্লবের নজির ইতিহাসে একেবারে অনুপস্থিত নয়। ১৬৮৮ সালে ইংল্যান্ডের গৌরবময় বিপ্লব এইভাবে বিনা রক্তপাতে অত্যাচারী শাসককে ক্ষমতা থেকে হটিয়ে দেবার একটি বড় নজির। ১৭৮৯ সালে ফ্রান্সে বা ১৮৪৮ সালে ইউরোপীয় মহাদেশে কিংবা ১৯৩৭ সালে রাশিয়াতে যে বিপ্লব হয়েছিল তা বিনা রক্তপাতে ঘটেনি। নিশ্চল সমাজের বৃদ্ধি ‘পুরানো শাসন’ বা আঁসাঁ রেজিমকে’ (Ancien Regime) চাপিয়ে দিয়ে যখন অপরিবর্তনীয় রক্ষণশীলতার অন্ধ প্রকোষ্ঠে মানুষকে বন্দি করে রাখা হচ্ছিল তখন—কী ফ্রান্সে, কী ইউরোপীয় মহাদেশে, কী রাশিয়ায়—মানুষ স্বৈরাচারের রক্ষণশীল শাসনকে ভেঙে নিজের বিপ্লব অস্তিত্বকে মুক্ত করার চেষ্টা করেছিল। সে চেষ্টা অসফল হতে পারে না—এক্ষেত্রে হয়ওনি। সংগ্রামের মধ্য দিয়ে ইতিহাসের ভারসাম্য এইভাবে মুক্তির অভিলাষী হয়েছিল—এইভাবেই তা হয়ে থাকে। আমরা বর্তমান পাঠের মধ্য দিয়ে মুক্তির এই অভিলাষকেই বুঝব আর এই বোঝার মধ্য দিয়ে জানব কেমন করে শেষপর্যন্ত মানুষই হয়ে দাঁড়ায় ইতিহাসের চিরন্তন চালিকাশক্তি। ১৭৮৯ সালে ফ্রান্সের কিংবা ১৯১৭ সালে রাশিয়ার বিপ্লব প্রমাণ করেছিল যে স্বৈরাচার যত অভ্যন্তরীণ হোক না কেন, তার আত্মক্ষয় যতই প্রকট হোক না কেন শেষপর্যন্ত তা ব্যর্থ কারণ মানুষের সমষ্টিগত অস্তিত্বের উপর দাঁড়িয়ে থাকে রাষ্ট্র। তাই সমাজকে বাদ দিয়ে ব্যক্তিত্বের স্বৈরাচারী শাসন রাষ্ট্রকে তার আত্মবিকাশের পরম লক্ষ্য নিয়ে যেতে পারে না। তাই রাষ্ট্র খোঁজে ভিন্ন আধার—লোকতন্ত্রের আধার, যে আধারে সমষ্টির স্বপ্ন সমগ্রের সাধনা হয়ে ইতিহাসকে পরিচালিত করে নিয়ে যায় তাকে মুক্তির চিরায়ত লক্ষ্য। এই মুক্তির বোধ গড়ে উঠবে আমাদের রাশিয়ার দুই বিপ্লবের ইতিহাস পাঠের মধ্য দিয়ে। আমাদের সরল চেতনায় বিরল ঘটনার জ্যোতির্ময় প্রসাদ আমাদের সাহায্য করবে স্বদেশ ও সমকালকে বুঝতে। সেই বোঝার উদ্দেশ্য নিয়ে আমরা পাঠ করব বর্তমান এককের বিষয়রাশি।

২(খ).১ প্রস্তাবনা

একজন ঐতিহাসিক বলেছেন যে যখন ইউরোপ পরিবর্তনের মধ্য দিয়ে যাচ্ছিল তখন রাশিয়াই ছিল একমাত্র দেশ যা ছিল অনড়—যেখানে ‘পুরানো শাসন’ (ancien regime) কায়েম হয়ে বসেছিল। (“In a Europe which was in the process of changing, Russia remained the most stable element, the state in which the Ancien Regime had been most fully maintained”—Joques Droz, *Europe between Revolutions* : 1815-1848)। এইরকম অপরিবর্তনীয় একটি দেশ ও একটি

সমাজব্যবস্থায় পরিবর্তনের চাকাকে ঘুরিয়ে দিয়েছিলেন জার দ্বিতীয় আলেকজান্ডার (Alexander II)। যিনি সার্ক বা ভূমিদাসদের আইনানুগ দাসত্বের বন্ধন থেকে মুক্তি দিয়ে ‘মুক্তিদাতা জার’ (Czar Liberator) বলে ইতিহাসে চিহ্নিত হয়েছিলেন। কিন্তু দুর্ভাগ্যবশত তাঁর সংস্কার-কার্য যতখানি পুরানো সমস্যাকে মিটতে সাহায্য করেছিল ঠিক ততখানিই জন্ম দিয়েছিল নতুন সমস্যার। যার পরিণতিতে তাঁকে অকালে আততায়ীর বোমায় নিহত হতে হল। আসলে রাশিয়াতে যাবতীয় সংস্কার কার্য রাজনীতির অভিমুখী ছিল না। সামন্তব্যবস্থা ভেঙে যাবার ফলে দেশে সামাজিক ও অর্থনৈতিক অবস্থার পরিবর্তন হয়েছিল কিন্তু রাজনৈতিক কাঠামোটিই অপরিবর্তিত থেকে গিয়েছিল। এশিয়ার গঠনতন্ত্রে ও তার রাষ্ট্রিক আদর্শে তিনটি ধারা ছিল যার একটিও বদলায়নি। প্রথম ধারাটি হল একটি জাতীয় বিকাশের ধারা ছিল (এক) স্লাভ (Slav) আদর্শ। দেশের ও বিদেশের সমস্ত স্লাভদের সর্বশেষ ও চূড়ান্ত প্রতিরক্ষা রাশিয়ার হাতে থাকতে হবে। জারিনা (Czarina) দ্বিতীয় ক্যাথারিনের (Catherine II) সময় থেকে এই ‘মিশন’ আদৌ কার্যকারী কিনা ভেবে দেখা হয়নি। দ্বিতীয় ধারাটি হল একটি ধর্মীয় ধারা। এই ধারার মূল কথা ছিল জারই (Tsar) হচ্ছেন বাইজানটিয়াম-এর সাম্রাজ্যের (empire of Byzantium) প্রকৃত উত্তরাধিকারী এবং সেই কারণে গ্রীক অর্থোডক্স চার্চের (Greek Orthodox church) সবচেয়ে প্রধান ধারক। বাইজানটিয়াম-এর স্মৃতি, রোমান ক্যাথলিক চার্চের মুখোমুখি খ্রিস্টধর্মের একটি প্রাচ্যশাখা হিসাবে গ্রীক অর্থোডক্স চার্চের গুরুত্ব ও ভূমিকা ইত্যাদি কখনো বিশ্লেষণ করে বা যাচাই করে দেখা হয়নি। অথচ প্রথাগতভাবে তারই ধ্যানে রাশিয়া নিমজ্জিত ছিল। তৃতীয় ধারাটি হল রাজনৈতিক শাসনের ধারা, জারের স্বৈরাচারী শাসনের ধারা। এই ধারায় আবহমান কাল ধরে স্থির হয়েছিল একটি কথা যে জারের ‘ইউকাস’ (ukase) বা আইনই (edict of the Czar) হচ্ছে দেশের সর্বোচ্চ আইন, কারণ সে আইন বিধাতা-নির্দিষ্ট আইন। স্বৈরাচারের এই রকম চরম প্রাতিষ্ঠানিক রূপ যে শিল্পবিপ্লবের যুগে অচল, তা যে পাশ্চাত্যের বহমান উদারনৈতিক (Liberalism) ও সমাজতন্ত্রের (Socialism) চিন্তাধারার সঙ্গে অসঙ্গতিপূর্ণ এবং তা যে নবাগত লোকতন্ত্রের আদর্শের পরিপন্থী একথা ভেবে দেখা হয়নি। এইভাবে রক্ষণশীল, প্রগতি পরিপন্থী সনাতন আদর্শের ত্রিধারা যখন জনজীবনের বিকাশের পথ বুদ্ধ করছিল তখনই তার বিরুদ্ধে জন্ম নিল সংহারের সমাজদর্শন—নিহিলিজম (Nihilism)। সমস্ত সামাজিক, রাষ্ট্রিক, অর্থনৈতিক প্রতিষ্ঠানকে ভেঙে ফেলে সভ্যতার নতুন ভাৱে এক নতুন সৃষ্টির আনন্দে মেতেছিল রাশিয়ার যুবশক্তি। এই রাষ্ট্রকে ভেঙে ফেলার আকাঙ্ক্ষা, সমাজকে বদলে দেওয়ার স্বপ্ন, আর প্রমত্ত যুব-উন্মাদনা—এই সমস্ত কিছুই ১৯০৫ সালের অকাল-বিপ্লবের (abortive revolution) প্রেক্ষিত রচনা করেছিল।

২(খ).২ প্রারম্ভিক কথা

দীর্ঘদিন রাশিয়ার জনগণের প্রতি রাশিয়ার প্রায় সব জারের সম্ভাষণই ছিল এই রকম : “ঈশ্বর আমাকে রাশিয়ার উপরে প্রতিষ্ঠিত করেছে। অতএব তোমরা আমার কাছে নত হও, কারণ আমার সিংহাসন হচ্ছে তাঁর বেদি” (“God has placed me over Russia and you must bow down before me, for my throne is His altar”)। স্যার ডোনাল্ড ম্যাকেন্জি ওয়ালেস (Sir Donald Mackenzie Wallace) তাঁর রাশিয়ার ইতিহাসে এই তথ্য পরিবেশন করে জানিয়েছেন যে এইভাবে নিজেকে ঐশী শক্তির অবতার করে জার ঘোষণা করতেন : “আমার (কারও) পরামর্শের প্রয়োজন নেই, কারণ ঈশ্বর আমার প্রজ্ঞা দিয়ে অনুপ্রাণিত করেন। সুতরাং তোমরা সকলে আমার দাস হয়ে গর্বিত বোধ কর, হে বুশবাসী, আমার ইচ্ছাকেই তোমাদের আইন

বলে জেনো” (“...I have no need of counsel, for God inspires me with wisdom. Be proud, therefore, of being my slaves, O Russians, and regard my will as your law”)। রাষ্ট্রের এরকম আকাশচুম্বী ভনিতার বিরুদ্ধে মাথা তুলে দাঁড়িয়েছিল নিহিলিষ্টরা। তারা মানুষের কাছে আবেদন রেখেছিল : “ও রাশিয়া জাগো, বিদেশী শত্রুদের দ্বারা ভুক্ত দাসত্বের দ্বারা জর্জরিত, নির্বোধ কর্তৃপক্ষ আর গুপ্তচরের দ্বারা নিগৃহীত তোমরা তোমাদের দীর্ঘ অজ্ঞতার নিদ্রা আর উদাসীনতা থেকে জাগো।” (“Awake, O Russia! Devoured by foreign enemies, crushed by slavery, shamefully oppressed by stupid authorities and spies, awoken from your long sleep of ignorance and apathy”) নিহিলিষ্টরা যে জনগণের মনে সাড়া জাগাতে পেরেছিল তার অন্যতম কারণ হল সরকার বেশ কিছুদিন ধরে জনগণের কাছে অপ্রিয় হয়ে উঠছিল। জনগণের থেকে সরকার চিরকালই বিচ্ছিন্ন ছিল, কিন্তু সাম্প্রতিক কালে যখন সরকার জনগণের কথা বলার স্বাধীনতা (freedom of speech), মুদ্রাযন্ত্রের স্বাধীনতা (liberty of the press), এবং জনগণের প্রতিনিধি প্রেরণের স্বাধীনতা (national representation) কেড়ে নিল, যখন বেআইনি ও স্বৈরাচারী পদ্ধতিতে ধরপাকড় (arbitrary arrest) শুরু করল এবং যখন জনগণকে বিনাবিচারে কারাদণ্ড দিতে এবং দেশের বাইরে চালান (deportation) করে দিতে লাগল তখন জনগণ ক্ষিপ্ত হয়ে পড়ল। তাদের মধ্য থেকে জেগে উঠল নিহিলিষ্টদের প্রতি সমর্থন। জার দ্বিতীয় আলেকজান্ডার নির্মম নিপীড়নের নীতিকে গ্রহণ করেও তাদের গমন করতে পারলেন না। তখন তিনি লোরিস-মেলিকফ (Lorismelikoff) নামক এক ব্যক্তিকে যাবতীয় স্বৈরাচারী ক্ষমতা দিয়ে তাদের প্রাথমিক কিছু কাজের দ্বারা জনগণের মধ্যে এই ধারণার সৃষ্টি করতে চাইছিলেন যে তিনি দীর্ঘস্থায়ী সংস্কারের কাজে হাত দেবেন। কিন্তু কিছুদিনের মধ্যেই জনগণের কাছে প্রকাশ হয়ে পড়ল যে এসবই হচ্ছে এক মস্ত প্রবঞ্চনা। সম্ভাব্য জনরোষের কথা ভেবে লোরিস-মেলিকফ জেনারেল কমিশন (General Commission) নামে এক প্রতিনিধি সভা নিয়োগের সিদ্ধান্ত করেন এবং সম্রাটের কাছ থেকে তার সম্মতিও আদায় করে ফেলেন। কিন্তু দুর্ভাগ্যবশত জেনারেল কমিশনকে মেনে নেওয়ার অব্যবহিত পরেই—সেই দিনেই—জার দ্বিতীয় আলেকজান্ডার নিহত হলেন। জেনারেল কমিশন আর বলবৎ হল না। সঙ্গে সঙ্গে বিপ্লবীরা দাবি করল সভার আয়োজন করতে হবে (“a national assembly elected on the basis of manhood suffrage”) এবং বাক-স্বাধীনতা, মুদ্রাযন্ত্রের স্বাধীনতা এবং জন-জমায়েতের অধিকার দিতে হবে। বোঝাই যাচ্ছিল জনমত বিপ্লবমুখী হয়ে পড়ছে।

২(খ).৩ তৃতীয় আলেকজান্ডার : স্বৈরাচার ও শিল্পায়ন : ১৯০৫ সালের বিপ্লবের পরোক্ষ কারণ

জার দ্বিতীয় আলেকজান্ডার সংস্কার-কার্যের সূচনা করে মানুষের মনে মুক্তি ও স্বাধিকার, স্বায়ত্তশাসন ও প্রতিনিধিত্বের (representation) ধারণাকে জাগিয়ে তুলেছিলেন। আবার তার পাশেই নির্মম স্বৈরাচারী নিপীড়ন দিয়ে মানুষের মুক্তির আকাঙ্ক্ষাকে দমিয়ে দিতে চাইছিলেন। এই দুই বিপরীত আদর্শের সংঘাতে রাষ্ট্র দিশাহারা হয়ে পড়ছিল। সমাজ হয়ে উঠছিল বিদ্রোহী। এই রকম এক সংকট মুহূর্তে ১৮৮১ সালে তাঁর মৃত্যুর পর তাঁর পুত্র তৃতীয় আলেকজান্ডার (Alexander III, 1881-94) জার হলেন। তিনি ছিলেন স্বৈরাচারী ও সৈনিক। সিংহাসনে আরোহন করেই তিনি ঘোষণা করলেন যে ‘ঈশ্বরের বাণী আমাদের নির্দেশ দিয়েছে সরকারের হাল শক্ত করে ধরতে, বিশ্বাস রাখতে স্বৈরাচারী ক্ষমতার শক্তি ও সত্যের উপর যাতে জনগণের মঙ্গলের জন্য

বাইরের যে কোন আক্রমণ থেকে তাকে আমরা বাঁচিয়ে রাখতে পারি” (“The voice of God orders us to stand firm at the helm of government...with faith in the strength and truth of the automatic power, which we are called to strength and preserve, for the good of the people, from every kind of encroachment”)। সৈনিক হিসাবে জার দাবি করতেন শৃঙ্খলা, স্বৈরাচারী হিসাবে দাবি করতেন আত্মসমর্পণ। তিনি বিশ্বাস করতেন বিপ্লবী সন্ত্রাসকে সংস্কার কার্যদ্বারা প্রশমিত করা যাবে না। তাকে স্তম্ভ করতে হবে বলপ্রয়োগে। অতএব রাশিয়াকে তিনি ফিরিয়ে নিয়ে গেলেন নিঃসীম স্বৈরতন্ত্রে। এই সময় থেকে রাজপরিবারে ও জারের পরামর্শদাতাদের মধ্যে সবচেয়ে গুরুত্বপূর্ণ ব্যক্তি হয়ে উঠেছিলেন চার্চের বিশিষ্ট পাদ্রী (Procurator of the Holy synod) পোবেডেনোস্টেভ (Pobedonostev) যাঁকে লিপসন (Lipson) বলেছেন ‘রাশিয়ার অশুভ শক্তি’ (“the evil genius of Russia”)। ইনি ছিলেন সাংবিধানিক সরকারের শত্রু। পাশ্চাত্যের সাংবিধানিক প্রতিষ্ঠানগুলিকে তিনি ঘৃণা করতেন। সাংবিধানিক সরকার তাঁর কাছে ছিল ইতিহাসের সবচেয়ে বড় ‘রাজনৈতিক মিথ্যাচার’, গণতন্ত্রকে বলতেন ‘ইতিহাসের বিদ্রম’। এইরকম ব্যক্তি যখন রাষ্ট্রশাসকের পরামর্শদাতা হলেন তখন দেশের দুর্যোগ যে ঘনিয়ে আসবে তাতে আর বিশ্বাসের কিছু নেই।

পোবেডেনোস্টেভের পরামর্শে তৃতীয় আলেকজান্ডার পিতার সংস্কারকার্যকে বাতিল করার চেষ্টা করলেন। ভূমিদাসদের আঞ্চলিক ভূস্বামীদের অধীনে ফিরিয়ে আনা হল। ভূস্বামীদের হাতে কৃষকদের শাসন করার আইন দেওয়া হল। এই ভূস্বামীদের বলা হতে লাগল ভূমিনিয়ন্তা (Land captains) যারা তাদের জমিতে কর্মরত ভাড়াটে কৃষক-শ্রমিক ও আশেপাশের কৃষকদের উপর পুলিশি ব্যবস্থা কয়েম করল। এইভাবে যে কৃষকরা বিপুল পরিমাণ ঋণ ও করের বোঝা মাথায় নিয়ে চলাছিল তারা এবার তাদের স্বাধীনতা হারাল। এর সঙ্গে সঙ্গে নির্বাচিত ম্যাজিস্ট্রেট বা জাস্টিস অফ পিসদের (Justice of Peace) সরিয়ে সেখানে মনোনীত ল্যান্ড ক্যাপ্টেন বা ভূমিনিয়ন্তাদের বসানো হতে লাগল। চেষ্টা হল সামন্ততন্ত্রকে ফিরিয়ে আনার। জেমস্টভো (Zemstvo) বা নির্বাচিত স্থানীয় স্বায়ত্তশাসনের সংস্থাগুলিকে সঙ্কুচিত করা হল। স্থানীয় উন্নয়নে এদের অনন্য সাধারণ ভূমিকাকে এইভাবে মুছে ফেলার চেষ্টা হল। মফস্বলে ও গ্রামাঞ্চলে ল্যান্ড ক্যাপ্টেনদের স্বৈরাচার নেমে এল। এর সঙ্গে সঙ্গে দেশে গোপন পুলিশের সংখ্যা ও তৎপরতা বাড়িয়ে দেওয়া হল। বিপ্লবীদের উপর নামানো হল নির্মম নিষ্পেষণ। তাদের কার্যকলাপ প্রায় বন্ধ হয়ে গেল। তারা ভাবতে লাগল হয়তো আর তাদের পক্ষে মাথা তুলে দাঁড়ানো সম্ভব নয়, হয়তো তাদের অপেক্ষা করতে হবে পরবর্তী জারের আগমন পর্যন্ত। এই সমস্ত কিছুর ফল হয়েছিল বিপজ্জনক। মানুষ আশঙ্কিত হল এই ভেবে যে দাসত্ব থেকে মুক্তির যে ঐতিহাসিক প্রক্রিয়া শুরু হয়েছিল কিছু কাল ধরে—যা সমস্ত দেশের মানুষদের আকাঙ্ক্ষিত লক্ষ্য, তাকে বিপরীতমুখী করে দেওয়া হচ্ছে। জেমস্টভোগুলির মধ্যে যে অসাধারণ সাধারণতন্ত্র লুকিয়েছিল তার স্থলে ল্যান্ড ক্যাপ্টেনদের (Land Captain) একনায়কতন্ত্র প্রতিষ্ঠা করা হচ্ছে। কৃষকরা বলতে লাগল “আমাদের আর কোন বিচারক নেই, আছে শুধু হুকুম দেবার অফিসার” (“We have no more judges, we have commanding officers”) দুর্ভিক্ষের সময়ে ল্যান্ডক্যাপ্টেন বা ভূমিনিয়ন্তারা জবরদস্তভাবে ত্রাণের কাজ ও খাদ্য সরবরাহ কুক্ষিগত করে রাখত যাতে দুঃস্থ কৃষকরা কম মজুরিতে কাজ করে। জেমস্টভোগুলির অবনমন মানুষ কিছুতেই মেনে নিতে পারেনি, কারণ শিক্ষা, স্বাস্থ্য, চিকিৎসা, পরিবেশ, পরিচ্ছন্নতা ও স্যানিটেশন (sanitation) সমস্ত ব্যাপারে এই স্থানীয় প্রতিনিধি-সংস্থাগুলি বিশেষ দক্ষতার পরিচয় দিয়েছিল। রাষ্ট্রের মাথায় সবাইকে ছাপিয়ে ছিল জারের স্বৈরাচার। গ্রামাঞ্চলে সবাইকে ছাপিয়ে দেখা দিল ভূমি নিয়ন্ত্রণ বা ল্যান্ড ক্যাপ্টেনদের স্বৈরাচার। নীরব, সহিষ্ণু মানুষদের মধ্যে এবার দেখা দিল হাহাকার।

২(খ).৪ অঙ্কুরিত শিল্পায়ন : পরিবর্তনের নতুন বীজ

নিপীড়ন দিয়ে যে পরিবর্তনকে তৃতীয় আলেকজান্ডার স্তম্ভ করতে চেয়েছিলেন সেই পরিবর্তনের দ্বার তিনি নিজেই খুলে দিলেন ভিন্ন পথে। বহু শতাব্দী ধরে রাশিয়া শিল্পের দিক দিয়ে অনগ্রসর ছিল। কৃষি ছাড়া অন্য কোন বড় শিল্প রাশিয়াতে গড়ে উঠতে পারেনি। যে দু-চারটি ছোট ছোট হস্ত ও কুটির শিল্প অপরিবর্তনীয় কৃষির আশেপাশে দেখা দিয়েছিল সেগুলির সবই ছিল ক্ষুদ্রায়তন, স্থানীয় সঙ্কীর্ণ শিল্প যার মাত্রা গার্হস্থ্য প্রয়োজনের মধ্যেই সীমাবদ্ধ ছিল। বড় বাজার, চাহিদা, শিল্পায়িত পণ্য, আদান-প্রদান, বিনিময় (exchange) ভিত্তিক অর্থনীতি, মুদ্রার বিনিয়োগ, অর্থের বা পুঁজির সঞ্চয় স্পৃহা—এসব আধুনিক শিল্পায়িত অর্থনীতির কোন পরিকাঠামো সেখানে গড়ে ওঠেনি। দ্বিতীয় আলেকজান্ডার শিল্পের উন্নতি চেয়েছিলেন। তাই তিনি প্রোটেকটিভ ট্যারিফ (Protective tariff) বা সংরক্ষণ শুল্ক ব্যবস্থা চালু করে রুশ শিল্পকে মদত দিতে চেয়েছিলেন। পিতার এই প্রচেষ্টাকে তৃতীয় আলেকজান্ডার আরও মদত দিয়ে শিল্পায়নের একটি ধারাকে তৈরি করতে চাইলেন। দেশ যাতে স্বনির্ভর হয় সেই দিকে তাঁর লক্ষ্য ছিল। জারের মন্ত্রী সারগেই উইট (Sergei Witte) বিশেষ প্রচেষ্টার দ্বারা রেল ও ব্যাঙ্ক ব্যবস্থার উন্নতি ঘটিয়ে ছিলেন। রুশো-পারসিক ব্যাঙ্ক (Russo-Persian Bank) ও ট্রান্স-সাইবেরিয়ান রেলওয়ে (Trans-Siberian Railway) জারের শাসন আমলের দুটি বড় কীর্তি। এই রেল ব্যবস্থা ইউরোপকে প্রশান্ত মহাসাগরীয় অঞ্চলের সঙ্গে যুক্ত করল। এরপর থেকে রাশিয়ার পক্ষে আর্থিক বাণিজ্যিক ও রাজনৈতিক ভাবে মধ্য এশিয়া ও সুদূর প্রাচ্যে প্রবেশ করা সম্ভব হল। দেশে বৈদেশিক অর্থ আসতে লাগল, কারণ দেশের ভেতর থেকে পুঁজি সংগ্রহ করা সম্ভব ছিল না। এর ফলে রাশিয়াতে ফ্যাক্টরি ব্যবস্থা দেখা দিল, কয়েকটি বড় শহর গড়ে উঠল এবং যে শিল্প ব্যবস্থা এতদিন শুধু পাশ্চাত্যের দেশগুলিতেই সীমাবদ্ধ ছিল তার অঙ্কুরোদ্গম হল রাশিয়াতেও। এর সঙ্গে সঙ্গে জনগণের মনে গণতন্ত্র ও সমাজতন্ত্রের ধারণাও ধীরে ধীরে আত্মপ্রকাশ করতে লাগল। নতুন শ্রমিক শ্রেণী গড়ে উঠতে লাগল, সাম্যবাদের দর্শনে তারা আগ্রহী হতে লাগল। এই শ্রমিক শ্রেণীর উত্থান এই সময়ের রাশিয়ার ইতিহাসের বড় ঘটনা ১৮৬৫ সাল থেকে ১৮৯০ সালের মধ্যে শ্রমিক শ্রেণীর বৃদ্ধির হার জনসংখ্যার বৃদ্ধি এবং এমনকী নাগরিক জনসংখ্যা বৃদ্ধির হারের থেকেও বেশি ছিল। বিংশ শতাব্দীর শুরুর দিকে রাশিয়াতে শিল্প শ্রমিকের সংখ্যা ২০ থেকে ২৫ লক্ষের মধ্যে ছিল। তাদের মধ্যে অনেকেই ছিল বংশানুক্রমিক (hereditary) শ্রমিক। সবচেয়ে বড় কথা হল যে কৃষকরা শ্রমিক হচ্ছে, চাষবাসের সময় গ্রামে ফিরে যাচ্ছে এমন ঘটনা বন্ধ হয়ে গেল। এবার সত্যিকারের ফ্যাক্টরি শ্রমিক-প্রলেটারিয়টের জন্ম হল (“It was no longer formed of peasants displaced from the country side and often returning to their villages for the harvest : it was a true factory proletariat”—Lionel Kochan, *The Making of modern Russia*, a Pelican Book, p.201)

১৮৯৪ সালে তৃতীয় আলেকজান্ডারের মৃত্যু হয়। তিনি নিপীড়নের নীতিকে বহাল রাখলেও শেষ পর্যন্ত পরিবর্তনের দরজা বন্ধ রাখতে পারেননি। বিদেশী পুঁজি, শিল্পায়িত সমাজের সূচনা বড় নগরের উত্থান, সুগঠিত শ্রমিক শ্রেণী পরিবর্তনের এক নতুন দিগন্তকে খুলে দিল। এতদিন কৃষিভিত্তিক, গার্হস্থ্য-শিল্প-সংযুক্ত অর্থনীতিতে শ্রেণী সংঘাত ভিত্তিক জনচেতনা ও গণ-আন্দোলনের কোন পরিবেশ ছিল না। এবার তা দেখা দিল। এতদিন জেমস্টভোগুলির ভেতর থেকে দাবি উঠেছিল যে জেমসকি সোবোর (Zemsky Sobor) বা দেশের সাধারণ সভা (General assembly of the land) গঠন করতে হবে। তার সঙ্গে যুক্ত হয়েছিল বিপ্লবী সন্ত্রাসবাদের

দ্বারা প্রচলিত গুপ্ত সংগঠন ও ব্যক্তি হত্যার রাজনীতি। এবার তার সাথে যুক্ত হল আশঙ্কার তৃতীয় মাত্রা—সাম্যবাদের ছোঁয়া লাগা সুগঠিত ও উদ্বুদ্ধ পুরুষ পরম্পরায় ফ্যাক্টরির কাজে নিযুক্ত শ্রমিক প্রলেটারিয়াট। আঠারো শতকের দ্বিতীয়ার্ধে ফ্রান্সে যে রকম একটি আসন্ন বিপ্লবের উপস্ফাপনার জন্য অপেক্ষা করছিল সেই রকম উনিশ শতকের শেষে রাশিয়াও দাঁড়িয়েছিল একটি সম্ভাব্য বিপ্লবের উদ্ঘাটন মুহূর্তে। সেই কারণে ১৮৮৩ সালে এঞ্জেলস (Engels) লিখেছিলেন— “Russia is the France of the last century”—“রাশিয়া হচ্ছে বিগত শতাব্দীর ফ্রান্স।”

২(খ).৫ দ্বিতীয় নিকোলাস : স্বৈরাচারী স্থিতিশীলতা ও শিল্পায়িত পরিবর্তনের দ্বন্দ্ব : ১৮৯৪-১৯১৭

রাশিয়ার ইতিহাসে স্বৈরাচার ছিল নিরঙ্কুশ ও ধারাবাহিক। ঐতিহাসিক রোজ [J. H. Rose, The Development of European Nations] সম্পাদিত ইউরোপের জাতিসমূহের প্রগতি নামক গ্রন্থটি পাঠ করলে বোঝা যায় যে স্বৈরাচারের দিক থেকে রাশিয়ার জারতন্ত্র কত ভিন্ন ও কত কঠোর ছিল। জার তৃতীয় আলেকজান্ডার নিজেকে গোপন পুলিশ গোয়েন্দা-সেনাবাহিনীর দ্বারা ঘিরে থাকা এক নিঃসীম সুরক্ষার মধ্যে বাস করতেন এবং তেরো বছর এইভাবে এক অদৃশ্য, বেপরোয়া শত্রুর সাথে দীর্ঘ ছায়াযুদ্ধ করে ভীত হতেন— সে শত্রু হচ্ছে উখিত ও জাগ্রত জনশক্তি যা নিহিলিস্ট বিপ্লবীদের সন্ত্রাস ও হত্যার কর্মসূচির মাধ্যমে প্রকট হচ্ছিল। তাঁর পরবর্তী জার দ্বিতীয় নিকোলাস এই ভয়ের থেকেই তাঁর স্বৈরাচারকে বাঁচিয়ে রাখতে চেয়েছিলেন। সিংহাসনে আরোহন করেই ঘোষণা করেন “আমি আমার সমস্ত প্রয়াসকে জাতির সমৃদ্ধিতে নিয়োগ করতে গিয়ে ততখানি দৃঢ়তা ও নিশ্চিতভাবে স্বৈরাচারের নীতিগুলিকে সংরক্ষণ করব যেমনভাবে করেছিলেন আমার পিতা” (“Devoting all my efforts to the prosperity of the nation I will preserve the Principles of Autocracy as firmly and unswavingly as my late father”)। এই স্থিতিশীল স্বৈরাচারের ঘোষিত লক্ষ্যে তিনি দশ বছর নিজেকে কায়ম রেখেছিলেন কিন্তু তারপরে শিল্পায়িত পরিবর্তনের বড় ফসল জাগ্রত জনচেতনাকে মেনে নিয়ে ইম্পেরিয়াল পার্লামেন্ট (Imperial Parliament) বা সর্বোচ্চ গণ-প্রতিনিধিত্ব সংগঠন তাঁকে মেনে নিতে হয়েছিল। কীভাবে তা সম্ভব হল তা পরে আলোচনা করব।

উনিশ শতকের শেষ দিকে নিহিলিজম বা বৈপ্লবিক সন্ত্রাসবাদের প্রভাব কমে যাচ্ছিল। বিপ্লবীরা বুঝতে পারছিল যে রাশিয়ার জনগণ দেশের সর্বোচ্চ ঐতিহ্যরূপে জারতন্ত্রের মহিমার কাছে আত্মনিবেদিত। তাদের জাগানো মুষ্টিমেয় মানুষের কাজ নয়। দেশের বিপুল সংখ্যক মানুষ কৃষক। গুপ্ত সংগঠন, সন্ত্রাস, ব্যক্তি হত্যার রাজনীতি তারা বোঝে না। যে কথা নেপোলিয়ন বুঝেছিলেন দীর্ঘদিন আগে বিপ্লবীরা এখন বুঝল যে কথা রাশিয়ার কৃষক রাজনৈতিক প্রচার বোঝে না (“The revolutionists learnt what Napoleon had discovered three quarters of a century earlier, that the Russian peasantry was not ripe for political propaganda”—Lipson)। শুধু তাই নয় তারা এও বুঝল যে দেশের শিল্পায়ন অর্থনীতির কাঠামো বদলে দিচ্ছে, জারতন্ত্রের হাতে রসদ ও ক্ষমতা অপরিসীম এবং বহু শতাব্দী সঞ্চিত সমস্যার মীমাংসা কিছু মানুষের কাজ নয়। জারতন্ত্রের স্থিতিশীলতাকে সন্ত্রাসবাদী বিপ্লবীরা ভয় দেখিয়েছিল কিন্তু নাড়িয়ে দিতে

পারেনি। এই নাড়িয়ে দেয়ার কাজটা করেছিল দেশের শিল্পায়ন। ইংল্যান্ডে শিল্পবিপ্লব ক্ষমতা এনে দিয়েছিল বণিক সমাজের হাতে। রাশিয়াতে সেই রকম বণিকসমাজের জন্ম হয়নি। ফলে রাষ্ট্র ও শ্রমিকদের মধ্যে কোন মধ্যশক্তি না থাকায় লড়াইটা ক্রমশ দাঁড়িয়ে যাচ্ছিল রাষ্ট্রশক্তি ও কৃষক শ্রমিক গণশক্তির মধ্যে। মুক্তিপ্রাপ্ত ভূমিদাস (serfs) অকস্মাৎ শ্রমের যোগানকে বাড়িয়ে দিল। রেলব্যবস্থা বাড়িয়ে দিল যোগাযোগ, মানবশক্তির চলাচল ও পণ্যসামগ্রীর সরবরাহ। বিদেশী পুঁজি এনে দিল শিল্পের উদ্যোগ। তুলা ও খনি শিল্প বাড়তে লাগল। ফ্যাক্টরি ব্যবস্থার প্রসার হল। শ্রমিক সংখ্যা বৃদ্ধি পেল। আর ১৯১৭ সালে রাশিয়া হয়ে দাঁড়াল পৃথিবীর পঞ্চম শিল্পায়িত দেশ। এই উন্নয়নের জন্য ১৮৯২ থেকে ১৯০৩ সাল পর্যন্ত উইটের (Witte) মন্ত্রিত্বকাল বিশেষভাবে দায়ী।

২(খ).৬ সোস্যাল ডেমোক্রেটদের উত্থান

শিল্পায়নের সাথে সাথে দেশে রাজনৈতিক দলেরও পরিবর্তন হতে লাগল। এই পরিবর্তনের সবচেয়ে বড় চিহ্ন হল সোস্যাল ডেমোক্রেট দলের আবির্ভাব। এই দল বুঝতে পেরেছিল যে দেশের রাজনৈতিক ভার (gravity) কৃষকদের থেকে সরে গেছে শ্রমিক ও কিছু বণিক ও শিল্পপতিদের উপর। তারা এও বুঝে ছিল যে জারতন্ত্র নামক একনায়কতন্ত্রকে সরাসরি উৎখাত করা যাবে না। ধারাবাহিক ইতিহাসের যে প্রক্রিয়া মারফত সবদেশে পরিবর্তন এসেছে রাশিয়া তার বাইরে নয়। অতএব সেখানে পার্লামেন্ট বা গণপ্রতিনিধিত্ব সভার প্রয়োজন। সমাজ পরিবর্তনের স্বপ্ন কখনোই সফল হবে না যদি তার আগে রাজনৈতিক পরিবর্তন সংঘটিত না হয়। সাম্যবাদ আর তার স্বপক্ষে প্রচার এবং আন্দোলন (agitation) সাংবিধানিক সরকারের অধীনে যতটা সম্ভব স্বৈরাচারের অধীনে তা সম্ভব নয়, কারণ প্রথমোক্ত সরকার জনগণের বাক স্বাধীনতা স্বীকার করে, তাকে জমায়েতের অধিকার দেয়, স্বৈরাচার দেয় না। শুধু তাই নয় যে প্রলেটারিয়েটের জন্ম হয়েছে তারা কোন-না-কোন দিন রাজনীতিক চেতনায় উদ্বুদ্ধ হবে। সেই উদ্বোধনের দিকে যেতে হলে তাদের লোকতান্ত্রিক শিক্ষা প্রয়োজন। এইভাবে সাম্যবাদকে সামনে রেখে সমাজ পরিবর্তনের জন্য গণতন্ত্রী ভাবনার বিকাশ হল। স্পষ্টতই নিহিলিস্টদের সংহারের দর্শন থেকে বিপ্লবের ভিন্নতর বুনিয়ে তৈরি হল। দেশের মানুষের অসন্তোষের মধ্যে বিস্ফোরণের বাবুদ জমা হয়েছিল। সংগঠনের কর্মসূচিও উপস্থিত। দরকার ছিল অগ্নিশলাকার। ১৯০৪-৫ সালের রুশ জাপান যুদ্ধে রাশিয়ার পরাজয় সেই প্রয়োজনীয় আগুনকে জ্বালিয়ে দিল।

২(খ).৭ ১৯০৪-০৫ সালের রুশ-জাপান যুদ্ধ : বিপর্যয়ের ঘনীভবন

১৯০৪-০৫ সালের রুশ-জাপান যুদ্ধ রাশিয়ার ইতিহাসে একটি দিক প্রবর্তনের ঘটনা। যুদ্ধের জন্য রাশিয়া প্রস্তুত ছিল না এবং অসাধারণ শৈথিল্য এবং অসংগঠিত প্রতিরোধ নিয়ে সে যুদ্ধে পরাজিত হয়েছিল। জারতন্ত্রের সমস্ত আশ্ফালন যে কত ফাঁকা, তার আমলাতান্ত্রিক শাসন যে কত অন্তঃসারশূন্য, তার সৈন্যবাহিনী যে কত অকর্মণ্য তা নিমেষে প্রকট হয়ে পড়ল। সরকার-বিরোধী জনমত প্রবল হল এবং তার প্রতিকারের ক্ষমতা সরকারের ছিল না। অসহায় সরকার বৈদেশিক বিষয়ে আত্মসমর্পণ করেছে। মানুষ ভাবল চাপ দিয়ে সরকারের কাছ থেকে সুযোগ-সুবিধা আদায় করার সময় এসেছে। মানুষের বিক্ষোভের বাবুদে অগ্নিপ্রজ্বলিত হল। ১৯০৪ সাল থেকে এই আগুন জ্বলতে শুরু করেছিল। সেই বছর জুলাই মাসে রাশিয়ার স্বরাষ্ট্র মন্ত্রী (minister of the interior) প্লেভ (Plehve) নিহত হলেন। এই প্রতিক্রিয়াশীল অত্যাচারী মন্ত্রী নিহত হবার আগে অন্তত

৪৮৬৭ জনকে বিনা বিচারে আটক করেছিলেন বা নির্বাসনে পাঠিয়েছিলেন। অতএব তাঁর মৃত্যু সন্ত্রাসবাদী রাজনীতিরকর্ম-কারণ সম্পর্কের যুক্তিগ্রাহ্য (logical) পরিণতি মাত্র।

২(খ).৮ ১৯০৫ সালের বিপ্লব

প্লেহভ (Plehve) নিহত হলে স্বরাষ্ট্র মন্ত্রী হলেন রাজকুমার মিরস্কি (Prince Mirsky)। তিনি ছিলেন প্রজ্ঞাদীপ্ত উদার রাজনীতিক। তিনি সংস্কারবাদীদের কাছে সংস্কারের প্রস্তাব চেয়ে আহ্বান পাঠালেন। তৎক্ষণাৎ জেমসট্ভো-র প্রতিনিধিরা “১১-দফা (Eleven Points) প্রস্তাব” দিলেন। এই প্রস্তাবে ছিল মানুষের শরীর ও আবাস সংক্রান্ত নিরাপত্তা (Inviability of person and domicile), বাক্ ও মুদ্রণ স্বাধীনতা, স্বায়ত্তশাসন ও পৌর স্বাধীনতা, স্বাধীনভাবে নির্বাচিত গণসভা যা আইন প্রণয়ন ও প্রশাসনে অংশগ্রহণ করতে পারবে, সংবিধান রচনার জন্য সংবিধান পরিষদ (Constituent Assembly) আহ্বান ইত্যাদি। এতদিন সংস্কার দাবি করত শুধুই শিক্ষিত শ্রেণী। এবার শিল্প শ্রমিক শ্রেণীও তাদের সঙ্গে সামিল হল। ১৯০৫ সালের জানুয়ারি মাসে একটি ধর্মঘট (strike) ডাকা হল। শ্রমিকরা দাবি করল দিনে অধিক আট ঘণ্টার কাজ, অধিক মজুরি, উন্নততর জঞ্জাল সাফাই ব্যবস্থা এবং বিবাদ মেটানোর জন্য সালিসীবোর্ড (arbitration boards)। সোস্যাল ডেমোক্রেটরাও এই দাবি সমর্থন করলে হঠাৎ করে শ্রমিক আন্দোলন একটা রাজনৈতিক মাত্রা গ্রহণ করল। ১৯০৫ সালের

প্রান্তলিপি

‘রক্তাক্ত রবিবার’ : ১৯০৫ সালের ৫ জানুয়ারি রাজধানীর পুলিশ এক বিরাট শ্রমিক মিছিলের উপর গুলি চালায়। এই মিছিলের নেতৃত্ব দিচ্ছিলেন জর্জ গাপন নামে এক ভাগ্যান্বেষী পুরোহিত। ১৩০ জন মানুষ নিহত হয়েছিল, আহত হয়েছিল আরও বিপুল সংখ্যক মানুষ। পুলিশের তরফে একটা বড় ভুল হয়ে গিয়েছিল। গাপন ছিলেন পুলিশের পরিচিত মানুষ কারণ তাঁর সংগঠন ছিল গোয়েন্দা পুলিশের গোপনে পরিচালিত সংগঠন। রাজতন্ত্রী মানুষ, পুলিশের ইনফর্মার এবং অনুগত শ্রমিকদের এই ইউনিয়নে রাখা হয়েছিল যাতে শ্রমিক আন্দোলনে পুলিশের প্রভাব থাকে। সরকার থেকে বারবার চেষ্টা করা হচ্ছিল শ্রমিক আন্দোলনকে তাদের কাঙ্ক্ষিত খাতে বইয়ে দেবার। এই উদ্দেশ্য সাধনের জন্য গাপন তৎপরতার প্রয়োজন—গুলি চালিয়ে শ্রমিকদের হত্যা করা নীতি ভুল। এ ঘটনা রবিবার হয়েছিল বলে এই দিন রাশিয়ার ইতিহাসে ‘রক্তাক্ত রবিবার’ বলে চিহ্নিত হয়ে আছে। এই হত্যাকাণ্ড দেশে ক্রোধের বিস্ফোরণ ঘটিয়েছিল, সরকারি কর্মচারী ও পুলিশের অযোগ্যতা প্রমাণ করেছিল এবং শ্রমিকদের মধ্যে রাজবিদ্বেষ প্রবল করে তুলেছিল। এই রাজবিদ্বেষই ভবিষ্যতে বিপ্লবকে ইম্বন যুগিয়েছিল।

প্রান্তলিপি

১৯০৫ সালের বিপ্লব কি রক্তক্ষয়ী বিপ্লব ছিল? এক অর্থে এই বিপ্লব রক্তক্ষয়ী হয়েছিল। ১৯০৫ সালের ডিসেম্বর মাসে যখন সরকার সেন্ট পিটার্সবুর্গের সোভিয়েতের সদস্যদের গ্রেপ্তার করে তখন মস্কোতে শ্রমিক ও অন্যান্য চরমপন্থীরা পুলিশ ও সৈন্যদের বিরুদ্ধে লড়াই করে। ২২ ডিসেম্বর থেকে ১ জানুয়ারি পর্যন্ত এই লড়াই চলে। রক্ত ঝরেছিল এই লড়াইতে যেমন রক্ত ঝরেছিল কুখ্যাত ‘রক্তাক্ত রবিবারে’। ডিসেম্বরের লড়াইতে মস্কোর বিপ্লবী শক্তি নিঃশেষিত হয়ে যায়।

অক্টোবর মাসে একটা সাধারণ ধর্মঘট (General Strike) ডাকা হল। শহরে শহরে শ্রমিকরা ধর্মঘট ও বিক্ষোভ করতে লাগল। গ্রামে কৃষকরাও অভ্যুত্থানের সামিল হল। লিপসন বলেছেন যে সাম্রাজ্যের সামাজিক ব্যবস্থা অচল হয়ে পড়ল আর সরকারকে আত্মসমর্পণ করা ছাড়া আর কোন উপায় থাকল না। (“The whole social system of the Empire came to a standstill, and no alternative remained to the Government but to give way”—Lipson)। ১৯০৫ সালে ৩০ অক্টোবর সরকার একটি ইস্তাহার বা ম্যানিফেস্টো প্রকাশ করল। এটি রাশিয়ার ইতিহাসে অক্টোবর ম্যানিফেস্টো নামে বিখ্যাত। এই ম্যানিফেস্টোকে রাশিয়ার ইতিহাসে একটি যুগান্তকারী

ঘটনা বলে বর্ণনা করা হয়। এই ম্যানিফেস্টোতে সরকার স্বীকার করে নিল নাগরিকদের অনেক মৌলিক অধিকার—শারীরিক নিরাপত্তা (inviability of person), বাক স্বাধীনতা, চিন্তার স্বাধীনতা, সংগঠন ও সমাবেশের স্বাধীনতা ইত্যাদি। ১৯০৫ সালের ২৪ ডিসেম্বর আরেকটি বিধান (Decree of 24 December) দ্বারা শ্রমজীবী মানুষ ও বিভিন্ন পেশাভুক্ত (professional classes) মানুষকে ভোটের অধিকার দেওয়া হল। কিন্তু বিপ্লবীদের এই জয় নিরঙ্কুশ হতে পারল না। প্রতিক্রিয়াশীলরা পুলিশ ও দুর্বৃত্তদের সাথে হাত মিলিয়ে এই পরিবর্তনকে বাধা দেবার চেষ্টা করল। এই প্রতিক্রিয়াশীল অভ্যুত্থানে সবচেয়ে বেশি অত্যাচারিত হয়েছিল রুশ ইহুদিরা।

২(খ).৯ সাংবিধানিক সংকট

১৯০৫ সালের অভ্যুত্থানে সবচেয়ে বড় দাবি ছিল একটি জাতীয় সভা (National Assembly) বা ডুমার (Duma) অধিবেশন ডাকতে হবে। জার এই ডুমা আহ্বানের দাবি মেনে নিয়েছিলেন। তদনুযায়ী রাশিয়ার প্রথম ডুমার অধিবেশন হয় ১৯০৬ সালের মে মাসে। এই ডুমায় সাংবিধানিক গণতন্ত্রীরা (Constitutional Democrats) ছিল সরকার বিরোধী, সংখ্যায় সবথেকে বড় বিরোধী দল। ডুমার ভেতরে সরকার বিরোধী বিতর্ক ক্রমশ জোরদার হতে লাগল। একদল যাদের cadets বলা হত, তারা ইংল্যান্ডের সংবিধান অনুযায়ী মন্ত্রী পরিষদ বা cabinet দাবি করছিল। যে ক্যাবিনেট দায়ী থাকবে জারের কাছে নয়, ডুমার কাছে। ডুমার ক্ষমতা তার অধিবেশনের আগেই ১৯০৬ সালে ৫ মার্চের ডিক্রির দ্বারা কমিয়ে রাখা হয়েছিল। বলা হয়েছিল যে দেশের ‘মৌলিক আইন’ (fundamental laws)—সৈন্যবাহিনী ও বিদেশ সংক্রান্ত বিষয় নিয়ে ডুমা কোন কথা বলবে না। তা জারের নিয়ন্ত্রণাধীন থাকবে। ৭২ দিন অধিবেশন করার পর বিতর্ক বিধ্বস্ত ডুমাকে জার বন্ধ করে দিলেন (dissolved)। নতুন ডুমার নির্বাচনের কথা ঘোষণা করা হল। রাজতন্ত্রীরা যাতে নির্বাচনে জিতে ডুমায় আসন গ্রহণ করতে পারে তার সব ব্যবস্থা করা হল। কিন্তু সরকারের যাবতীয় তৎপরতা সত্ত্বেও বিরোধী শক্তিই আবার নির্বাচিত হল। সংখ্যাগরিষ্ঠের ক্ষমতা রইল তাদেরই হাতে। ১৯০৭ সালের ৫ মার্চ থেকে ১৬ জুলাই পর্যন্ত চলেছিল দ্বিতীয় ডুমার অধিবেশন। পুনরায় সরকারের সঙ্গে নির্বাচিত ডেপুটিদের (Deputies) বিরোধ বাধল এবং কয়েকজন ডেপুটিকে অধিবেশনের মধ্যেই গ্রেপ্তার করা হয়েছিল। অতএব এই ডুমার অধিবেশন বন্ধ করে সরকার নির্বাচনের আইন বদলে দিল। স্থির হল এর পর থেকে ভূস্বামীরাই (Landowners) ভোটদান করতে পারবে। সুতরাং ১৯০৭ সালের নভেম্বর মাসে যখন তৃতীয় ডুমার অধিবেশন বসল তখন দেখা গেল সংখ্যাগরিষ্ঠ ডেপুটি বা জনপ্রতিনিধি হচ্ছে রাজতন্ত্রের সমর্থক। এই ডুমাকে ১৯২২ সাল পর্যন্ত তার পুরো সময় কাজ করতে দিতে সরকারের কোন বাধা রইল না। সেই একই বছর চতুর্থ ডুমা নির্বাচিত হল। একই রকম ভাবে রাজতন্ত্রীদের দিয়ে ঠাসা ডুমা শাস্তই রইল। কিন্তু অশান্তির ঝড় এল বাইরে থেকে। ১৯১৪ সালে প্রথম বিশ্বযুদ্ধ শুরু হল।

তাহলে দেখা যাচ্ছে যে প্রথম বিশ্বযুদ্ধ শুরু হওয়ার সময় পর্যন্ত রাশিয়াতে যে সংস্কার কার্য সম্পন্ন হয়েছিল জারের স্বৈরাচারী শাসন প্রতিনিয়ত তাকে নস্যাত্ত করার চেষ্টা করেছে। কিন্তু সম্পূর্ণভাবে নস্যাত্ত করতে পারেনি। দেশে শিল্পায়ন এসে যোগাযোগ ব্যবস্থা দ্রুত করেছিল এবং শ্রমিক শ্রেণীর ও সামাজিক গণতন্ত্রী (Social democrat) চিন্তার উদ্ভব ঘটিয়েছিল। ১৯০৫ সালের কৃষক শ্রমিক অভ্যুত্থান সে সাংবিধানিকতার সূচনা করেছিল তা শেষপর্যন্ত সংকটের মধ্যে বিলীন হয়ে যায়। বলা যেতে পারে যে ১৯০৫ সালের বিপ্লব রাজতন্ত্রকে উচ্ছেদ করতে সফল না হলেও সংসদীয় শাসনতন্ত্রের শুভসূচনা করেছিল। রাজতন্ত্রের উচ্ছেদ ১৯০৫ সালের

বিপ্লবের লক্ষ্য ছিল না। তার লক্ষ্য ছিল আইনের শাসন, মানুষের শারীরিক মানসিক স্বাধীনতা, শ্রমজীবী ও পেশাদার মানুষের ভোটদানের ও অন্যান্য মৌল অধিকার। এর অনেকটাই অর্জন করা গিয়েছিল ১৯০৫ সালে। অবশিষ্ট আয়ত্ত হয়েছিল ১৯১৭ সালের বিপ্লবে।

২(খ).১০ ১৯১৭ সালের মার্চ ও নভেম্বর মাসের দুই বিপ্লব

বুশ-বিপ্লব প্রধানত দুটি পর্যায়ে বিভক্ত—একটি পর্যায় ১৯০৫ সালের বিপ্লব যার ইতিহাস আমরা পাঠ করেছি এবং অন্যটি ১৯১৭ সালের বিপ্লব যার ইতিহাস আমরা পাঠ করব। ১৯১৭ সালের বিপ্লবের দুটি পর্যায়ে আছে—প্রথম পর্যায়টি ১৯১৭ সালের মার্চ মাসে সংঘটিত হয়েছিল (নতুন ক্যালেন্ডার অনুযায়ী মার্চ মাস)। দ্বিতীয় পর্যায়টি হয়েছিল নভেম্বর মাসে (নতুন ক্যালেন্ডার অনুযায়ী। পুরানো ক্যালেন্ডার অনুযায়ী এই বিপ্লব হয়েছিল ফেব্রুয়ারি এবং অক্টোবর মাসে)। বলা হয়ে থাকে যে বিপ্লবের রাজনৈতিক অধ্যায়টি সূচিত হয়েছিল মার্চ-মাসে, এর সামাজিক পর্বটি সম্পন্ন হয়েছিল নভেম্বর মাসে। এই দুটি বিপ্লব সম্মিলিত ভাবে পৃথিবীর প্রথম শ্রমিকদের প্রজাতন্ত্র (First workers' Republic) প্রতিষ্ঠার পথ প্রশস্ত করেছিল। ১৯১৭ সালের বিপ্লবের কারণগুলি নিম্নরূপ।

১. ১৯০৫ সালের বিপ্লবের উত্তরাধিকার :

ট্রটস্কি বলেছিলেন যে “১৯০৫ সালের বিপ্লব ১৯১৭ সালের বিপ্লবের ড্রেস-রিহাস্যাল। এই বিপ্লব জারতন্ত্রের ভিত্তি শিথিল করে দিয়েছিল। ১৯০৫ সালের বিদ্রোহ শেষ হয়েছিল রক্তাক্ত যুদ্ধে। প্রতিক্রিয়াশীল দক্ষিণ-পশ্চিমীরা পুলিশ ও সৈনিকদের সাথে হাত মিলিয়ে অনেক বুদ্ধিজীবী মুক্তিপন্থী মানুষ ও ইহুদিদের হত্যা করে। ফলে বিশ্বাস-ঘাতকদের সম্মুখে একটা চাপা আক্রোশ সমাজের মধ্যে গোপনে লালিত হচ্ছিল। ১৯০৫ সালে শ্রমিক-কৃষক ঐক্য গড়ে উঠেছিল, সর্বহারার উত্থান এই প্রথমবার বলিষ্ঠভাবে প্রকাশ হয়ে পড়ল। কৃষককে সঙ্গে রেখে সর্বহারা শ্রমিকদের লড়াই হবে শ্রেণী সংগ্রামের শেষ লড়াই এবং সে লড়াইতে শ্রমিকশ্রেণীর নেতৃত্বে বিপ্লব সম্পন্ন হবে এই তত্ত্বের একটি ছোট রাজনৈতিক প্রয়োগ ঘটেছিল ১৯০৫ সালে। এই বিপ্লবের সময়েই গড়ে ওঠে শ্রমিকদের সোভিয়েত—একটি নতুন সংগঠন যার পূর্ণরূপ পাওয়া যায় ১৯১৭ তে গড়ে ওঠা শ্রমিক-সৈনিক কৃষক সোভিয়েতে। বিপ্লবের একটা ছোট কিন্তু

প্রান্তলিপি

নতুন ক্যালেন্ডার কী?

৪৬ খ্রিস্টপূর্বাব্দে রোমানসম্রাট জুলিয়াস সিজার (Julius Caesar) জ্যোতির্বিদ সোসিজেনেস-এর (sosigenes) পরামর্শে স্থির করলেন যে একবছর হবে ৩৬৫^২-দিনে। প্রত্যেক চার বছরে একটি অতিরিক্ত দিন পাওয়া যাবে যাকে যুক্ত করা হবে ফেব্রুয়ারি মাসের সঙ্গে এবং সেই অতিরিক্ত দিন সম্বলিত বছরটিকে বলা হবে ‘লিপ ইয়ার’ (Leap year)। এই ক্যালেন্ডারকে বলা হয় জুলিয়ান ক্যালেন্ডার (Julian calendar)। কিন্তু দেখা গেল যে সোসিজেনেস-এর গণনা একেবারে নির্ভুল নয়। প্রকৃত সৌরদিন এবং জুলিয়ান ক্যালেন্ডারের সৌরদিন যদি পরস্পরে সাথে মেলানো যায় তবে ১২৮ বছরে একটি অতিরিক্ত দিন হয়। ষোড়শ শতাব্দীতে দেখা গেল জুলিয়ান ক্যালেন্ডারের বছর প্রকৃত সৌর বছর থেকে ১৩ দিন পিছিয়ে আছে। তখন জ্যোতির্বিদদের দিয়ে গণনা করিয়ে পোপ গ্রেগোরি (Pope Gregory XIII) জুলিয়ান ক্যালেন্ডার থেকে দশটি দিন বাদ দিয়ে দেন। ১৫৮২ সালের ৪ অক্টোবরের পরের দিন হল ১৫ অক্টোবর। তখন থেকে এই ক্যালেন্ডারই চলছে। জুলিয়ান ক্যালেন্ডার হল পুরানো (Old style) ক্যালেন্ডার। গ্রেগোরিয়ান ক্যালেন্ডার হল নতুন (New style) ক্যালেন্ডার। রাশিয়ার অর্থডক্স গ্রীক চার্চ পুরানো ক্যালেন্ডার অনুসরণ করত। ১৭৫২ সাল ছিল সার্বিক ক্যালেন্ডার পরিবর্তনের কাল। এই পরিবর্তন নিম্নরূপ :

১৭৫২, সেপ্টেম্বর ২ = ১৭৫২, সেপ্টেম্বর ২

১৭৫২, সেপ্টেম্বর ৩ = ১৭৫২, সেপ্টেম্বর ১৪

মনে রাখতে হবে যে এই দুই ক্যালেন্ডার মতেই খ্রিস্টীয় প্রথম শতাব্দী হল ১০১ থেকে ২০০ শতাব্দী, ১০০ থেকে ২০০ নয়। অনুরূপভাবে বিংশ শতাব্দী হল ১৯০১ থেকে ২০০০ সাল, অন্যথা নয়। আধুনিক রাশিয়ায় সারা পৃথিবীর মতো নতুন ক্যালেন্ডার ব্যবহৃত হয়।

প্রায় নিখুঁত মডেল ছিল বলেই ১৯১৭ সালে বিপ্লবীরা অগ্রসর হতে পেরেছিল। এই কারণেই টুটস্কি তাঁর ‘১৯০৫’ নামক গ্রন্থে এই বিপ্লবকে ১৯১৭ বিপ্লবের (সুসজ্জিত মহড়া) ড্রেস রিহাস্যাল বলেছেন।

২. ভূমি সমস্যা

রাশিয়ার কৃষক দাসত্ব থেকে মুক্তি পেয়েছিল, কিন্তু শাস্তি পায়নি। মুক্তিপণ হিসাবে তাদের দিতে হত বিপুল ক্ষতিপূরণ—ভূস্বামীদের জমিতে কাজ না করার ও জবরশ্রম বা বেগার না খাটার ক্ষতিপূরণ। ঐতিহাসিক ভিনোগ্রাদোফ [P. Vinogradoff, *Lectures on the History of the Nineteenth Century*] বলেছেন যে রুশ কৃষকদের একমাত্র লক্ষ্য ছিল যাতে বেশি করে উপার্জন করতে পারে যা দিয়ে তারা কর দিতে পারবে [“for the majority of the Russian peasantry the primary object in life is to earn enough to pay the taxes”]। কৃষকরা মনে করত যে আঠারো শতকে ভূস্বামীদের যেমন করে বাধ্যতামূলক সামরিক কাজ থেকে অব্যাহতি দেওয়া হয়েছিল সেইরকমভাবে তাদেরও ভূস্বামীদের কাছে দেয় আর্থিক জরিমানা থেকে মুক্তি দিতে হবে। তাছাড়া জনসংখ্যা যত বড় ছিল ততই কৃষকদের ব্যক্তিগত জমি ভাগ হয়ে ক্রমশ কমে আসছিল। ক্ষুদ্রায়তন জমি নিয়ে বিব্রত কৃষকরা জানত না যে

উৎকৃষ্ট উর্বর জমির থেকে পর্যায়ক্রমে বিপুল ফসল কীভাবে তুলতে হয়। এর কারণ তাদের কৃষিকাজের কৃৎ-কৌশল ছিল অত্যন্ত প্রাচীন। তাদের হাতে যথেষ্ট পুঁজিও ছিল না যার দ্বারা তারা নতুন উদ্যোগ রূপায়িত করতে পারে। ব্যক্তিগত উদ্যোগ নেওয়াও অনেকদিন পর্যন্ত সম্ভব ছিল না কারণ স্বল্প ‘মির’ বা গ্রামসমাজের (village community) উপর ন্যস্ত ছিল। কিন্তু সমস্ত কিছুকে ছাপিয়ে উঠেছিল প্রত্যেক কৃষকের আয়ত্ত্বহীন জমির স্বল্পতা। তারা আরও জমি দাবি করছিল আর এই দাবির মধ্যে বিপ্লবীরা দেখেছিল এক ‘বিনাতত্ত্বে সুপ্ত সমাজতন্ত্র’ (latent socialism without a doctrine)। “আরও জমি (more land’) বিপ্লবের আগে গ্রামাঞ্চলের স্লোগান হয়ে দাঁড়িয়ে ছিল। ১৯০৫ সালের বিপ্লবের অব্যবহিত পরেই জারের মন্ত্রী স্টোলিপিন (Stolypin)।* বিক্ষুব্ধ কৃষকদের বিপ্লবী চেতনাকে

প্রান্তলিপি

স্টোলিপিন : সেন্ট পিটার্সবার্গ বিশ্ববিদ্যালয় থেকে স্নাতক হওয়া একজন ভূস্বামীপুত্র ছিলেন স্টোলিপিন। চল্লিশ বছর বয়সে তিনি স্যারাটোভ (Saratov) প্রদেশের শাসক নিযুক্ত হয়েছিলেন। ১৯০৫ সালে তিনি ইহুদী ও বিপ্লবীদের উপর নির্মম অত্যাচার করেন। তিনি সরকারকে বুঝিয়েছিলেন যে কৃষকদের দিয়ে বিপ্লবকে দমন করা যাবে। তার জন্য তাদের অধীনে জমিকে ‘মির’-এর হাত থেকে নিয়ে তাদের ব্যক্তি সম্পত্তিতে পরিণত করতে হবে। তার ফলে সৃষ্টামদেহী শক্তিশালী কৃষকরা ভূ-স্বামীদের মানসিকতা অর্জন করে চলতি ব্যবস্থাকেই টিকিয়ে রাখার চেষ্টা করবে। আর যারা অশক্ত, ক্ষীণ তার ঝরে গিয়ে কৃষিক শ্রমিক হয়ে কৃষির জন্য প্রয়োজনীয় শ্রমের যোগানকে অব্যাহত রাখবে। তিনি বলেছিলেন “The Government relied not on the feeble and the drunk, but on the soild and strong”—“সরকার নির্ভর করেছিল কঠিন ও শক্তিশালীর উপর, ক্ষীণ ও প্রমত্তদের উপর নয়।”

নিয়ন্ত্রণ করে তাদের রাজতন্ত্রের অনুগামী করতে চেষ্টা করেন। তিনি ভেবেছিলেন যে ‘মির’-এর নিয়ন্ত্রণ থেকে জমির স্বল্প তুলে নিয়ে কৃষকদের হাতে তুলে দিলে তারা জমির স্বল্পের সঙ্গে ব্যক্তি মালিকানার মর্যাদালাভ করবে। জমির মালিক হয়ে তারা রক্ষণশীল বিপ্লব বিরোধী ভূমিকা গ্রহণ করবে। ফল হল ঠিক বিপরীত। কিছু কৃষক জমি ও মালিকানা পেয়ে ফুলে ফেঁপে উঠল, তৈরি হল এক পুঁজিবাদী কৃষক শ্রেণী (a class of capitalist farmers)। যাদের বলা হত কুলাক (Kulaks)। আর অন্যদিকে বিপুল এক কৃষকশ্রেণী যাদের জমি হস্তচ্যুত হওয়ার ফলে যারা হয়ে দাঁড়াল ভূমিহীন ভূমি-শ্রমিক (land labourers)। এইভাবে গ্রামাঞ্চলে এক বিরাট জনশক্তি সর্বহারার পর্যায়ে নেমে গিয়ে তৈরি করল বিপ্লবের অগ্নিগর্ভ চেতনা যা সমস্ত কায়েমি স্বার্থের (vested interests) প্রতিষ্ঠান জারতন্ত্র ভেঙে ফেলার সময়ে বিপ্লবের বর্শা-ফলক হিসাবে কাজ করেছিল। মনে রাখতে হবে যে বিপ্লব দেশের সমস্ত শক্তির কাছে একই অর্থ বয়ে আনে না। সৈনিকদের কাছে বিপ্লব হল

শান্তি, যুদ্ধের অবসান। শহরে শ্রমিক—সর্বহারা প্রলেটারিয়েটের কাছে—বিপ্লব হল পুঁজিবাদের নিয়ন্ত্রণ। কৃষকদের কাছে বিপ্লব হল ভূমিদান। জারের সরকার সৈনিক-শ্রমিক-কৃষকদের দিতে পারেনি তাদের আকাঙ্ক্ষিত বস্তু। তাই তারা মরিয়া হয়ে বিপ্লবের পথে পা বাড়িয়েছিল। কৃষকরা বেপরোয়া হয়ে সন্ত্রাসের পথ বেছে নিল। ভূস্বামীদের জমি তারা কেড়ে নিল, ম্যানর-হাউস (manor house) বা খামার বাড়ি পুড়িয়ে দিল এবং স্থানে স্থানে ভূস্বামী ও তাদের নিযুক্ত নজরদার (overseer) হত্যা করতে লাগল। প্রত্যক্ষদর্শী বলশেভিক নেতারা বলেছিলেন “বৈপ্লবিক বর্বরতা নিয়ে কৃষকরা মধ্যযুগের বর্বরতাকে মুছে দিচ্ছে”। যখন এইভাবে বিদ্রোহী কৃষকরা দেশের গ্রামাঞ্চলের স্থিতিশীলতাকে তছনছ করছিল তখনই মধ্যবিত্ত শ্রেণী দখল করে ক্ষমতা (১৯১৭ সালের মার্চ বিপ্লব)। কিন্তু কৃষকদের কাঙ্ক্ষিত জমি দিতে পারেনি। সেই বুর্জোয়াদের ব্যর্থতার মুহূর্তে কৃষকরা হাত মেলাল শ্রমিকদের সঙ্গে লক্ষ্য মধ্যবিত্ত শ্রেণীর অপসারণ। এই মিলনই সুগম করল ১৯১৭ সালের নভেম্বর বিপ্লবের।

৩. প্রলেটারিয়েটের জাগরণ :

আমরা আগেই পড়েছি যে বিপ্লবের অনেক আগেই রাশিয়াতে এক বিরাট শিল্পায়িত প্রলেটারিয়েটের জন্ম হয়েছিল যাদের মধ্যে অনেকেই ছিল দ্বিতীয় বা তৃতীয় প্রজন্মের শ্রমিক। অর্থাৎ hereditary workers বা পুরুষানুক্রমিক শ্রমিক বিপ্লবের আগেই আত্মপ্রকাশ করেছিল। কিন্তু সমস্ত শ্রমিকই ধারাবাহিক বিবর্তনের মধ্য দিয়ে শ্রমিক হয়নি। রাশিয়াতে দ্রুত শিল্পায়ন এসেছিল ফলে শ্রমিকদের চাহিদা অমোঘভাবে বেড়ে যাচ্ছিল। আর এই চাহিদা মেটানোর জন্য ক্রমাগত গ্রামাঞ্চলের কৃষকদের টেনে আনা হচ্ছিল শহরের ফ্যাক্টরি ব্যবস্থার মধ্যে। এইভাবে শহরের শ্রমিক শ্রেণীর সঙ্গে গ্রামাঞ্চলের কৃষকদের একটা যোগ থেকে যাচ্ছিল, যোগ থেকে যাচ্ছিল শহরাঞ্চলের ফ্যাক্টরি ব্যবস্থার সঙ্গে অভ্যন্তরের মাটি আর তার সঙ্গে লেগে থাকা কৃষিজীবনের। পশ্চিম ইউরোপে, ইংল্যান্ড, ফ্রান্স ইত্যাদি দেশের শ্রমিকরা মধ্যস্থ থেকে শিক্ষানবিশি বা এপ্রেন্টিসশিপের (apprenticeship) সুযোগ পেয়ে আসছিল। সেখানে গিল্ড ব্যবস্থার (guild system) শৃঙ্খলা শ্রমিকদের উপর বহুযুগের আরোপিত শৃঙ্খলা যে শৃঙ্খলার ভগ্নাংশ রাশিয়ার শ্রমিকদের মধ্যে ছিল না। তাদের সম্বন্ধে বলা হয়ে থাকে যে কৃষিক্ষেত্র থেকে অকস্মাৎ ছিন্ন করে তাদের ফ্যাক্টরির অগ্নিকুণ্ডে নিক্ষেপ করা হয়েছিল (“it was thrown into the factory couldron snatched directly from the plough”)। জমি থেকে ছিন্ন হওয়ার ফলে তাদের রক্ষণশীলতা কেটে গিয়েছিল আবার শিক্ষিত শ্রেণীর থেকে দূরে থাকার জন্য তাদের অমার্জিত ঔষ্ধ্যত্ব কমেনি। তারা চেয়েছিল শ্রমদানের সময়ের হ্রাস, অধিক মজুরি (wage), উন্নততর স্যানিটেশন (sanitation), এবং ১৯০৫ সালের পর ভোটাধিকার। এই রকম জাগ্রত শ্রমিক হাতিয়ার হিসাবে ধর্মঘট বা strike-এর গুরুত্ব বুঝে গিয়েছিল, আর চোখের উপর দেখেছিল পুলিশি শাসনের রক্তক্ষয়ী নিপীড়ন। তাদের উন্মীলনের মুহূর্তে রাশিয়ায় এসেছিল মার্ক্সবাদ, সমাজতন্ত্র ও বলশেভিক দল। শৃঙ্খল ছাড়া যে তাদের হারানোর কিছু নেই এ তথ্য জানতে পেরেই তারা বিপ্লবের জন্য প্রস্তুত হচ্ছিল।

মনে রাখতে হবে যে ১৯১৭ সালের বিপ্লবের জন্য রুশ সমাজে চারটি বিস্ফোরক উপাদানের প্রয়োজন ছিল আর চারটিই উপস্থিত ছিল সমানভাবে। তা হলো বিক্ষুব্ধ কৃষক, বিদ্রোহী শ্রমিক, রণক্লান্ত সৈনিক এবং সুসংগঠিত রাজনৈতিক দল। এই চারটিকে একটি সূত্রে গেঁথে ছিল জনচেতনা ও রাজনৈতিক আদর্শ। আমরা উপরে দেখেছি কেমন করে জনচেতনা বিপ্লবীমুখী হয়েছিল এবং বিক্ষুব্ধ কৃষক ও বিদ্রোহী শ্রমিকরা শেষপর্যন্ত ১৯১৭ সালের মার্চ মাসের পর বুর্জোয়া নেতৃত্বের ব্যর্থতার পর ঐক্যবন্ধ হয়েছিল পরিবর্তিত কর্মসূচিতে। পরে

আমরা দেখব সৈন্যরা রণক্লান্ত হয়ে শান্তি-সম্প্রদায় হয়েছিল। প্রথম বিশ্বযুদ্ধের আঘাত দেশের অন্য সব মানুষের মতো সৈন্যবাহিনীও সহ্য করতে পারেনি। বিপ্লব তাদের অবসাদগ্রস্ত শান্তির প্রলেপ দিয়েছিল।

৪. প্রথম বিশ্বযুদ্ধের অভিঘাত ও রণক্লান্ত সৈন্যবাহিনীর শান্তি অন্বেষণ

প্রথম বিশ্বযুদ্ধে রাশিয়ার ক্ষতি হয়েছিল সব থেকে বেশি। ১৯১৪-১৯১৮ এই চার বছরের যুদ্ধে রাশিয়ার যে পরিমাণ মানুষ নিহত হয়েছিল, রণসম্ভার ধ্বংস হয়েছিল, খাদ্যদ্রব্যের অপচয় হয়েছিল এবং অর্থ বিনষ্ট হয়েছিল তা কল্পনাতীত। ইউরোপের কোন রাষ্ট্রের এত ক্ষতি হয়নি। বলা হয়ে থাকে যে বেয়োনোট ও মেশিনগান রাশিয়ার যত মানুষকে হত্যা করেছিল, পশু করেছিল তার থেকে অনেক বেশি। মানুষ ধ্বংস হয়েছিল রোগ, খাদ্যাভাব, বজ্রাভাব, শীত ও প্রকৃষ্ট সমরায়োজনের অভাবে। একজন রুশ সেনাপতি স্বীকার করেছিলেন— “বর্তমান যুগের সামরিক কলা কৌশল আমাদের জানা নেই” (“the presentday demands of military technique are beyond us”)। রাশিয়ার আধুনিক যুদ্ধাস্ত্রের অভাব অনেকখানি পুরিয়ে দিয়েছিল পশ্চিমের বন্দুক্রাষ্টগুলি। কিন্তু রাশিয়ার যানবাহন ও যোগাযোগ ব্যবস্থার দুর্বলতার জন্য মানুষ-সৈন্য-সম্ভার-অস্ত্র কোন কিছুকেই দ্রুত রণাঙ্গণে (war front) পাঠাতে পারত না। রাশিয়ার ছিল মানবশক্তি (man power) এবং প্রাকৃতিক সম্পদ (natural resources)। কিন্তু তার অর্থনৈতিক অনগ্রসরতা এসবের কোন কিছুকেই কাজে লাগাতে দেয়নি। হঠাৎ সৈন্যের দরকার হওয়ায় কৃষকদের সামরিক পোশাক পরানো হয়েছিল। এই অদক্ষ মানুষ সৈনিক-শৃঙ্খলার রীতিনীতিকে আয়ত্ত করতে না পারায় কার্যকালে তারা অপয়োজনীয় ভার হয়ে দাঁড়িয়েছিল। এই পরিস্থিতিতে স্বাভাবিকভাবেই সৈনিকরা রণক্লান্ত হয়ে পড়েছিল। রণাঙ্গণ থেকে সংবাদ আসছিল “সমস্ত ইউনিট যুদ্ধ করতে অস্বীকার করেছে” (“whole units refused to fight”)। একজন অফিসার বলেছেন “কেউ আর যুদ্ধ করতে চাইছিল না। সকলের চিন্তা নিবন্ধ ছিল একটি জিনিসের উপর-তা হল শান্তি” (“Nobody wanted to fight any more, all their thoughts were for one thing only—peace”)। ডুমার সভাপতি ঘোষণা করলেন যে “বিপ্লবের অনেক আগেই সৈন্যবাহিনীর ভেঙে পড়ার ক্ষেত্র প্রস্তুত হয়ে গেছে” (“the ground for the final disintegration of the army was prepared long before the Revolution”)। এই ভাঙনই বিপ্লবের সবথেকে বড় সহায়ক হয়েছিল। জারতন্ত্রের নিপীড়নের যন্ত্র ভেঙে গেল, তার আত্মরক্ষার বর্ম খসে গেল। এরপর স্বৈরাচার যে ধসে যাবে তাতে আর কোন সন্দেহ রইল না।

৫. রাজনৈতিক দল ও বিপ্লবের আদর্শ

বিপ্লবের পরিস্থিতিতে গুছিয়ে অভ্যুত্থানের মুহূর্তটিকে সার্থক করে তোলার জন্য দরকার হয় প্রকৃত আদর্শের এবং সেই আদর্শকে একটি কর্মসূচিতে রূপায়িত করতে পারে একটি রাজনৈতিক দল। পশ্চিমের শিল্পায়িত সমাজে অনেকদিন ধরেই বিপ্লবী মার্ক্সবাদ একটি সুসংবদ্ধ, বৈজ্ঞানিক, কর্মসূচি ভিত্তিক সমাজ ও রাজনৈতিক দর্শন হিসাবে আত্মপ্রকাশ করেছিল। রাশিয়ার মার্ক্সবাদী দল প্রতিষ্ঠিত হয় ১৮৮৩ সালে সুইজারল্যান্ডে। জর্জ প্লেখানভ (George Plekhanov) সেখানে নির্বাসনে থাকা কালীন এই দল প্রতিষ্ঠা করেন। ১৮৯৮ সালে রাশিয়ার ভেতর রুশ সোস্যাল ডেমোক্রেটিক দলের জন্ম হয়। একদিকে মার্ক্সবাদ অন্যদিকে জার্মান সোস্যাল ডেমোক্রেটিক দলের গতানুগতিক আদর্শ নিয়ে এইদল চলছিল। ১৯০৩ সালে পার্টি কংগ্রেসের অধিবেশন পর্যন্ত বড় মাপের বিপ্লবী সংকেত এদলের ভেতর থেকে আত্মপ্রকাশ করেনি। তা হল যখন লেনিন (Lenin) এই দলের চিন্তাধারাকে বদলে দিলেন। লেনিনের চিন্তাকেই আমরা পরে পাঠ করব।

২(খ).১১ লেনিন ও বলশেভিক দলের উত্থান

লেনিনের আসল নাম ভ্লাদিমির ইলিচ উলিয়ানভ (Vladimir Ilyitch Ulyanov) [১৮৭৯-১৯২৪] “এন. লেনিন” (“N. Lenin”) রাজনৈতিক উদ্দেশ্যে গৃহীত তাঁর ছদ্মনাম। তিনি জন্মেছিলেন ভলগা (Volga) নদীর তীরে সিমবার্গ (Simbirsk) নামক স্থানে (বর্তমান নাম উলিয়ানোভস্ক — Ulyanovsk)। তাঁর পিতা সেখানে জেলা স্কুলের পরিদর্শক ছিলেন। ১৮৮৭ সালে জার তৃতীয় আলেকজান্ডারকে হত্যার ষড়যন্ত্রে লিপ্ত করে ফাঁসি দেওয়া হয়। তারপর থেকেই তিনি মার্ক্সবাদী বিপ্লবী সাহিত্যে নিমগ্ন হয়ে যান। সেই বছরই তাঁকে কাজান (Kazan) বিশ্ববিদ্যালয় থেকে বহিষ্কার করা হয় এবং তিনি বহিরাগত ছাত্র হিসাবে আইন পরীক্ষা দিয়ে স্নাতক হন। ১৮৯৩ সালে তিনি সেন্ট পিটার্সবার্গে (বর্তমান নাম লেনিনগ্রাড) চলে যান এবং সেখানে মার্ক্সবাদী দলের নেতা হন। ১৮৯৬ সালে বিপ্লবী পত্রিকা প্রকাশ করার জন্য তাঁকে গ্রেপ্তার করে সাইবেরিয়াতে নির্বাসন দেওয়া হয়। সেখানে তিনি আরেকজন নির্বাসিতা নারী নাদেজদা কনস্ট্যান্টিনোভা ক্রুপস্কায়াকে (Nedezhda Konstantinova Krupskaya) বিবাহ করেন। ১৯০০ সালে তিনি সাইবেরিয়াকে থেকে প্রত্যাবর্তন করে দেশান্তরে চলে যান এবং ‘ইস্কা’ (‘Iskra’ যার অর্থ স্ফুলিঙ্গ) নামে একটি বিপ্লবী পত্রিকা প্রকাশ করেন। তখন তাঁর ধ্যানজ্ঞান সবই ছিল সম্প্রতি প্রতিষ্ঠিত রুশ সোস্যাল ডেমোক্রেটিক দলের কাজ করা।

১৯০৩ সালে সোস্যাল ডেমোক্রেটিক দলের কংগ্রেসের অধিবেশনের সময় দলের গঠনতন্ত্র কী হবে তা নিয়ে আলোচনা হয়। লেনিন এবং প্লেখানভ চেয়েছিলেন যে দলের সদস্যপদ সীমাবদ্ধ থাকবে শুধু তাদের মধ্যে যারা দলের কোন সংগঠনেই একটিতে ব্যক্তিগতভাবে অংশগ্রহণ করবে (“personally participate in one of the organizations of the party”)। এঁদের বিপক্ষে থেকে মারটভ (Martov) ও লিওঁ ট্রটস্কি (Leon Trotsky) চেয়েছিলেন যে সদস্য হবেন তারাই যারা “দলের কোন সংগঠনের নিয়ন্ত্রণে ও নেতৃত্বে কাজ করবে” (“work under the control and guidance of one of the party organizations”) প্রথমটি অনুযায়ী দলের গুরুত্বপূর্ণ সিদ্ধান্ত গ্রহণ করবে একটি ছোট বৃত্তের মধ্যে থাকা জঙ্গি ও সক্রিয় সংগঠকরা। দ্বিতীয়টি অনুযায়ী দল হবে একটি মুক্ত দল। যাকে পরিচালিত করবে নথিভুক্ত সদস্য ও সমর্থকদের যৌথ ভোট দানের ক্ষমতা (“an open party, guided by the collective voting power of all its enrolled supporters and sympathizers”)। লেনিন বিশ্বাস করতেন যে সংরক্ষিত সদস্য ব্যবস্থার দ্বারা দলের বৈপ্লবিক উদ্যোগ বজায় থাকবে এবং তার নিরাপত্তাও অক্ষুণ্ণ থাকবে। মুক্ত সদস্যব্যবস্থা হলে জার্মান ডেমোক্রেটিক দলের আকৃতি নেবে রুশ মার্ক্সবাদী দল। আর মুক্ত গণতন্ত্রী দল জারপন্থী (Czarist) রাশিয়ার নিষ্পেষণে কাজ করবে কীভাবে? শেষ পর্যন্ত লেনিনের দল দুই ভোটে জিতে যায় এবং সংখ্যা-গরিষ্ঠ মানুষ বা “Majority-men” বলে চিহ্নিত হয়। রুশ ভাষায় তাদেরই বলা হয় ‘বলশেভিকি’ (Bolsheviks)। অপরপক্ষ হয়ে দাঁড়াল সংখ্যা-লঘু মানুষ (minority-man) বা ‘মেনশেভিকি’ (‘Mensheviks’)। এইভাবে বাইরে থেকে বিপ্লবের আদর্শ ও রাজনৈতিক দল যতই সংঘবদ্ধ হচ্ছিল ভেতরে তখন জারতন্ত্র ততই দুর্বল হয়ে পড়ছিল। শেষপর্যন্ত তার অভ্যন্তরীণ পচন রোধ করা তার পক্ষে সম্ভব হল না। সে ভেঙে পড়ল।

২(খ).১২ ১৯১৭ সালের মার্চ বিপ্লব : জারতন্ত্রের পতন

১৯১৭ সালের মার্চ বিপ্লবের সময় রাশিয়ার ক্ষমতাসীন জার ছিলেন দ্বিতীয় নিকোলাস (১৮৬৮-১৯১৮)। তিনি ছিলেন ইতিহাসের এক অভিশপ্ত সম্রাট। তাঁর বিবাহ হয়েছিল পিতার মৃত্যুশয্যায়। তাঁর অভিষেক অনুষ্ঠানে

৩,০০০ মানুষ পিষ্ট হয়ে মারা গিয়েছিল। তাঁর একমাত্র পুত্র দুরারোগ্য ব্যাধিতে আক্রান্ত হয়েছিল। তিনি তাঁর নফ্টবুন্ডি স্ত্রীর (জার্মান রাজকন্যা) নিয়ন্ত্রণাধীন ছিলেন এবং তাঁর স্ত্রী ও তিনি নিজে রাশপুটিন (Gregor Rasputin ১৮৭৩-১৯১৬) নামে এক লম্পট সন্ন্যাসীর প্রভাবে ভুল পথে চালিত হয়েছিলেন। তাঁর সময়ে রাশিয়া যুদ্ধে (রুশ-জাপান যুদ্ধ) জাপানের কাছে পরাজিত হয়েছিল। পরে প্রথম বিশ্বযুদ্ধে (১৯১৪-১৮) ইংল্যান্ড ও ফ্রান্সের সহযোগী হয়েও রাশিয়া জার্মানির কাছে নিদারুণভাবে পরাজিত হয়। তাঁর রাজত্বকালেই (১৮৯৪-১৯১৭) দুবার বিপ্লব হয়েছিল—১৯০৫ ও ১৯১৭ সালে। শেষ বিপ্লবের পর ১৯১৮ সালের ১৭ জুলাই বলশেভিকরা তাঁকে সপরিবারে হত্যা করে।

একদিকে স্বৈরাচারী অন্যদিকে অস্থিরমতি স্ত্রীর পদানত, একদিকে শাসক হিসাবে নির্মম অন্যদিকে মানুষ হিসাবে এক দুশ্চরিত্র সন্ন্যাসীর প্রভাবাধীন এমন সশ্রুট সংকট নিরসনে (Crisis management) সফল হতে পারেন না। দ্বিতীয় নিকোলাস তা হতে পারেনওনি। তাঁর রাজত্বকালের সংকট ঘনিয়ে এসেছিল ১৯১৭ সালের মার্চ মাসে যখন নিদারুণ খাদ্যাভাব দেখা দিল। তার আগেই ১৯১৬ সাল থেকে রাশিয়া যুদ্ধে হারছিল। রণক্লান্ত সৈন্যরা ঘরে ফিরতে চাইছিল। আর দেশের মানুষ বলতে শুরু করেছিল—প্রথাগতভাবে সংকটের সময় তারা তাই বলত—যে ‘অশুভ শক্তি’ (‘dark forces’) রাশিয়াকে গ্রাস করেছে। জার-তাঁর জার্মান স্ত্রীর প্রভাবে

প্রান্তলিপি

গ্রেগরি এফিমোভিচ রাসপুটিন (*Gregory Eforich Rasputin*) : ১৮৭১-১৯১৬
একজন বিকটদর্শন ধর্মোন্মত্ত (fonatic) কৃষক। ১৯০৪ সালে তিনি ধর্মীয় জীবন গ্রহণ করবেন বলে নিজের পরিবারকে ত্যাগ করেছিলেন। তাঁর আচার-আচরণে এক ব্যক্তিগত আকর্ষণ ছিল আর তার ধর্ম ও দর্শন প্রচারে ছিল স্বাভাবিকতা-রহিত উন্মাদনা। রাশিয়ার জারিনা তাঁর অনুরক্ত উপাসিকা ও শিষ্যা ছিলেন। রাজনীতিতে তাঁর হস্তক্ষেপের জন্য অভিজাত ব্যক্তিদের দ্বারা তিনি নিহত হন।

জার্মানির প্রতি অনুরক্ত (pro-German) রাজভক্তদের দ্বারা তাঁর রাজসভা পূর্ণ করেছেন। এখন জার্মান স্ত্রীর প্রভাবে জার্মানির সঙ্গে যুদ্ধ না করে গোপনে জার্মানির সঙ্গে সন্ধি করছে। এই রকম গুজবে জনমত যখন ক্ষিপ্ত হয়ে রাজবিদ্বেষী হয়ে পড়েছে তখনই খাদ্যাভাব দেখা গেল। অভ্যুত্থান আসন্ন হয়ে পড়ল একদিকে রাজতন্ত্র, অন্যদিকে যুদ্ধের বিরুদ্ধে। ১৯১৭ সালে ৮ই মার্চ পেট্রোগ্রাডের বস্ত্রশিল্পের নারী কর্মীরা খাদ্যের দাবিতে পথে নামল। তার পরের দিন অন্য সব শিল্পের শ্রমিকরা তাদের সমর্থনে রাস্তায় মিছিল করতে লাগল। সকলের দাবি একটাই “বুটি চাই”। সকলের স্লোগানও এক “যুদ্ধ নিপাত যাক”, “স্বৈরতন্ত্রনিপাত যাক” (“Down with the war!” “Down with the autocracy”)। তৃতীয় দিনে আন্দোলন একটা সাধারণ ধর্মঘটের (General Strike) রূপ নিল। সমাজের নিপীড়িত মানুষরা এবার প্রকাশ্যে বেরিয়ে এল। একটি পুলিশ রিপোর্টে জানা যায় সৈনিকদের মানসিকতা দেখে জনগণ উৎসাহিত হয়েছিল। সৈন্যরা প্রথমে নিরপেক্ষ ও নিষ্ক্রিয় ছিল। পরে তারা আন্দোলনকারীদের সমর্থন জানায়। এই আন্দোলন তুঙ্গে ওঠে। পেট্রোগ্রাডে একলক্ষ এবং মস্কোতে পঁচিশ হাজার শ্রমিক ধর্মঘট (strike) করে। চারিদিকে সরকারি কর্মচারীদের অকর্মণ্যতা, ব্যর্থতা ও দুর্নীতির বিরুদ্ধে আন্দোলন হতে থাকে। ডুমার বিশিষ্ট সদস্যরা দাবি করল যে ফ্রান্স ও ইংল্যান্ডের অনুকরণে দায়িত্বশীল সরকার গঠন করতে হবে। জনতার আন্দোলন অনুপ্রাণিত করল সৈনিকদের। জার বিদ্রোহী জনতার উপর গুলি চালাতে হুকুম দিলেন। সৈন্যরা অস্বীকার করল। ১১ মার্চ জার ডুমা ভেঙে দিলেন। ডুমার সদস্যরা ডুমা ভেঙে দেওয়ার আদেশ অমান্য করল। বিপ্লব ছড়িয়ে পড়ল চারিদিকে। এইবার অভ্যুত্থান ঘটাল ডুমার সদস্যরা। তাঁরা একটি বিকল্প সরকার—একটি সাময়িক সরকার (provisional Government) গঠন করার সিদ্ধান্ত নিলেন। জারকে সিংহাসন

ত্যাগ করতে বলা হলো। ১৫ মার্চ তিনি সিংহাসন ত্যাগ করলেন। রাজতন্ত্র বাতিল হল। অস্থায়ী সরকার ক্ষমতা অধিগ্রহণ করল। ১৭৮৯ সালের ফরাসী বিপ্লবে প্যারিস যে ভূমিকা পালন করেছিল ১৯১৭ সালের বিপ্লবে পেট্রোগ্রাড সেই ভূমিকা পালন করল। রাজধানীতে যে ঘটনা ঘটে গেল সারা দেশ তা মেনে নিল। জারতন্ত্রের পতন হল। স্বৈরাচারের অবসান হল। শ্রমিকরাই ক্ষমতা জয় করেছিল কিন্তু তাকে রাখতে না পেরে ফিরিয়ে দিল মধ্যবিত্ত শ্রেণীর হাতে। (“The power was won by the workers but they at once resigned it to the middle class”)। ক্ষমতাকে ধরে রাখার আত্মপ্রত্যয় তখনও তাদের হয়নি। যুদ্ধাঙ্গনে (war front) সৈনিকদের এই আভ্যন্তরীণ বিপ্লবে ভূমিকা কী হবে তাও নিশ্চিত হয়নি। শুধু এইটুকু স্থির ছিল যে ডুমার দ্বারা প্রতিষ্ঠিত সরকার প্রতি-বিপ্লবকে ঘটতে দেবে না। যে বিপ্লবের কোন পূর্ব পরিকল্পনা ছিল না এবং যা ছিল একেবারেই স্বতঃস্ফূর্ত তা চরম ও পরম রাজনৈতিক সাফল্যের সূচনা করল। শুধু ক্ষমতা রয়ে গেল বুর্জোয়াজির হাতে—শ্রমিকদের হাতে নয়। সবচেয়ে বড় কথা হল জার দ্বিতীয় নিকোলাস ক্ষমতাচ্যুত হলেন। তিনশত বছরের অধিক সময় যে রোমানফ বংশ রাশিয়াতে রাজত্ব করত তার পতন ঘটল। স্বৈরাচারকে উৎপাটিত করে জনগণতান্ত্রিক সরকার প্রতিষ্ঠিত হল। অতএব বলা যেতে পারে যে মার্চ বিপ্লব জনগণতান্ত্রিক বিপ্লব। এই বিপ্লব শ্রমিক শ্রেণীর একনায়কত্ব প্রতিষ্ঠিত করেনি। তা করেছিল ১৯১৭ সালের নভেম্বর বিপ্লব।

২(খ).১৩ ১৯১৭ : মার্চ থেকে নভেম্বর : বলশেভিক বিপ্লবের প্রস্তুতি পর্ব

১৯১৭ সালের মার্চ মাসে রাশিয়ার রাজধানী পেট্রোগ্রাডে দুটি পৃথক শাসকগোষ্ঠী জনগণের প্রতিনিধিত্ব করছিল—এক অস্থায়ী সরকার (Provisional Government) এবং দুই শ্রমিকদের প্রতিনিধিদের নিয়ে গঠিত সোভিয়েত। এই দুটি সংস্থাই জনগণের খণ্ডাংশের প্রতিনিধিত্ব করত। অস্থায়ী সরকার গঠিত হয়েছিল উদারনৈতিক (liberal) মধ্যবিত্তদের নিয়ে। তিনটি দল এর অন্তর্ভুক্ত হয়েছিল। মন্ত্রিত্বের প্রধান ছিলেন প্রিন্স লভফ (Lvoff)। তিনি ছিলেন ব্যবসায়ী ও উদারনৈতিক ভূস্বামীদের প্রতিনিধি। পররাষ্ট্রমন্ত্রী বা বিদেশ বিষয়ক মন্ত্রী ছিলেন পল মিলিউকফ (Paul Milyukoff)। তিনি দীর্ঘদিন ধরে রাশিয়ার সংস্কার আন্দোলনের সাথে যুক্ত ছিলেন। তিনি সাংবিধানিক গণতন্ত্রী দলের (Constitutional Democratic Party) প্রতিনিধি রূপে মন্ত্রীসভায় আসন গ্রহণ করেছিলেন। আর ছিলেন কেরেনস্কি (Kerensky)—একজন বিপ্লবী সমাজতন্ত্রী। শ্রমিকদের সোভিয়েত সংগঠনটির দরকার ছিল বুর্জোয়া সরকারকে অন্তরাল থেকে নিয়ন্ত্রণ করার জন্য। ১৯০৫ সালে যখন সাধারণ ধর্মঘটের নেতারা (leaders of the general strike) কার্য পরিচালনার জন্য সংঘবদ্ধ হয়েছিলেন তখনই শ্রমিক প্রতিনিধিদের সোভিয়েত (Soviet of Worker Deputies) নামক একটি সংগঠনে গড়ে ওঠে। ১৯১৭ সালের মার্চ-মাসে যখন সৈন্যবাহিনী ‘কল্যাণজনক নিরপেক্ষতা’ (benevolent neutrality) জানিয়ে শ্রমিকদের উপর গুলি চালাতে অস্বীকার করে তখন সেনা প্রতিনিধির এই সোভিয়েতের অন্তর্ভুক্ত করা হয়। সোভিয়েতের উপস্থিতির ফলে অস্থায়ী সরকারের ক্ষমতা হ্রাস পেল, তৈরি হল দ্বৈত কর্তৃপক্ষ, দ্বৈত আনুগত্য। একদিকে একদল মধ্যবিত্ত (office) বা পদ অধিকার করে রইল। অন্যদিকে শ্রমিক ও সৈনিকরা ক্ষমতা অধিকার করে থাকল। ১৯১৭-র নভেম্বর বিপ্লব এই দ্বৈত কর্তৃত্বের অবসান ঘটিয়ে ক্ষমতা ও দপ্তর সবই তুলে দিল সোভিয়েতের হাতে।

মার্চ মাস থেকে নভেম্বর মাস পর্যন্ত যে সময় তাকে বলা হয়েছে “যুক্তিশীল উদারনীতি, সুশৃঙ্খল সংস্কারের সময় (“The period of reasoned liberalism, of ordered reform”)। অস্থায়ী মন্ত্রীসভা

ফিন্‌ল্যান্ডকে তার সংবিধান ফিরিয়ে দিয়েছিল, পোল্যান্ডকে তার ঐক্য ও স্বশাসন ফিরিয়ে দেবার প্রতিশ্রুতি দিয়েছিল, ইহুদিদের অন্য নাগরিকের সঙ্গে সমান রাজনৈতিক, সামাজিক ও সামরিক অধিকার ফিরিয়ে দিয়েছিল এবং একটি সার্বিক ক্ষমা (general amnesty) প্রদর্শন করে নির্বাসিত ও সাইবেরিয়াতে আবদ্ধ অসংখ্য মানুষের প্রত্যাবর্তন সহজ করে দিয়েছিল। কিন্তু এই অস্থায়ী সরকার কৃষকদের জমি দিতে পারেনি, শ্রমিকদের প্রাপ্য সুবিধার ব্যবস্থা করতে পারেনি এবং সৈনিকদের দিতে পারেনি শান্তি। সৈনিকদের মধ্যে ক্রমশ বিশৃঙ্খলা বাড়ছিল। তারা অফিসারদের কথা শুনছিল না। অফিসারদের কোন সিদ্ধান্ত নেওয়ার আগে অসংখ্য সৈনিক-কমিটির সঙ্গে আলোচনা করতে হচ্ছিল। রণাঙ্গনে সৈনিকরা যুদ্ধ করা থেকে বিরত থাকছিল। সাম্যবাদী চিন্তা সবাইকে আচ্ছন্ন করে ফেলেছিল। সেপ্টেম্বর মাসে ২ তারিখ জার্মানি রিগা (Riga) নামক অঞ্চলটি দখল করে। জাতীয় অপমান ও লজ্জা আপামর সমস্ত মানুষকে গ্রাস করল।

২(খ).১৪ লেনিনের আগমন ও নভেম্বর বিপ্লব

দেশ যখন ক্রমশ এই অশান্তির মধ্যে তলিয়ে যাচ্ছিল তখন লেনিন দেশে ফিরলেন। ১৯১৭ সালের ১৬ এপ্রিল (নতুন ক্যালেন্ডার অনুযায়ী) জার্মানির ভেতর দিয়ে ঢাকা ট্রেনে তিনি ফিরলেন। একজন ঐতিহাসিক বলেছেন যে এটি ছিল রাশিয়ার ভাগ্য যে ব্যক্তি ও সময় একই মুহূর্তে উপস্থিত হল (“It was Russia’s destiny that the man and the occasion should present themselves at the same moment” [Lipson])। লেনিনের আসার সঙ্গে শান্তিপূর্ণ বিবর্তনের পথে রাষ্ট্রক্ষমতা দখলের চিন্তা ক্ষীণ হয়ে এল। রাজধানী পরিবেশ নিরস্তর গভীর হয়ে উঠছিল, শ্রমিক ও সৈন্যবাহিনীর মধ্যে অস্থিরতা বাড়ছিল, গ্রামাঞ্চলে কৃষকরা নয়া সম্ভ্রাস নামিয়েছিল, আর যুদ্ধক্ষেত্রে সেনাবাহিনী বিমূঢ় অবস্থায় বিকল ব্যবস্থার সব ছবিকে ফুটিয়ে তুলছিল। আসন্ন ঝড়ের ঘনায়মান তিমিরে লেনিন এলেন। ট্রটস্কি লিখেছেন যে লেনিন পৃথিবীর সবচেয়ে বড় বিপ্লবীদের অবিসংবাদিত নেতা হয়েছিলেন কারণ তাঁর চিন্তাধারা দেশ ও যুগের বিপুল বৈপ্লবিক সম্ভাবনার পদধ্বনি বুঝতে পেরেছিলেন। লেনিন এসে বললেন যে দেশ কোন সংসদীয় গণতন্ত্র চায় না। বিপ্লবের প্রথম পর্যায় মধ্য শ্রেণীর হাতে ক্ষমতা তুলে দিয়েছে। এবার প্রস্তুত হতে হবে দ্বিতীয় পর্যায়ের জন্য। এ পর্যায়ের ক্ষমতা তুলে দিতে হবে শ্রমিক ও কৃষকদের হাতে। অর্থাৎ এক কথা বুর্জোয়া-গণতান্ত্রিক (Bourgeois democratic) বিপ্লবকে সমাজতান্ত্রিক (Socialist) বিপ্লবে পরিণত করতে হবে। এই পরিকল্পনা নিয়ে ১৯১৭ সালের ৭ নভেম্বর বলশেভিক দল (যারা ইতিপূর্বে মেনশেভিকদের থেকে স্বতন্ত্র হয়ে পড়েছিল) বিপ্লবের চাকা ঘুরিয়ে দিল। একটি ছোট সশস্ত্র বাহিনী রেল স্টেশন, টেলিফোন এক্সচেঞ্জ, স্টেট ব্যাঙ্ক, পোস্ট অফিস ও নানাবিধ সরকারি অফিস অধিকার করে নিল। কিছু মন্ত্রীকে গ্রেপ্তার করা হল, কেবল ট্রটস্কি পালিয়ে গেলেন, সেনাবাহিনীর সদরদপ্তর অধিকার করা হল। লেনিন হলেন প্রধানমন্ত্রী, ট্রটস্কি হলেন বিদেশমন্ত্রী। পৃথিবীর ইতিহাসের সবচেয়ে বড় এবং সবচেয়ে পরিকল্পিতভাবে সংক্ষিপ্ত বিপ্লব প্রায় বিনা রক্তপাতে সংঘটিত হল।

২(খ).১৫ নভেম্বর বিপ্লবে লেনিনের ভূমিকা

এই বিপ্লব পরিকল্পিতভাবে সংক্ষিপ্ত কেন একটু বলা দরকার। লেনিন বলেছিলেন দুটি কথা—এক, “আমাদের কোন সংসদীয় প্রজাতন্ত্রের দরকার নেই। আমাদের কোন বুর্জোয়া গণতন্ত্রের দরকার নেই” (“We don’t need any parliamentary republic. We don’t need any bourgeois democracy”)। পাশ্চাত্যে পুঁজিবাদের রাজনৈতিক বিবর্তনের একটা ধারা ছিল। সেই ধারায় একটি অধ্যায় হল সংসদীয় গণতন্ত্র। লেনিন জানতেন রাশিয়াতে শিল্পবিপ্লব হয়েছিল মূলত রাষ্ট্রের পৃষ্ঠপোষকতায় এবং পঞ্চাশ বছরের মধ্যে—অর্থাৎ শিল্পায়ন শুরু হওয়ার পাঁচ দশকের মধ্যে রাশিয়াতে সেই ধরনের পুঁজিপতি (capitalist) class জন্মায়নি যা জন্মেছিল ইংল্যান্ড ও ফ্রান্সে। অতএব রাশিয়ার শিল্পায়িত সমাজ বিবর্তনে এই অধ্যায় পূর্ণাঙ্গভাবে গড়ে উঠবে না। পাশ্চাত্যের অনুকরণে বিকৃত পুঁজিবাদের একটি রাজনৈতিক রূপ হবে বুর্জোয়া গণতান্ত্রিক রাষ্ট্র। লেনিন সেই অনুকরণ সঙ্কীর্ণ রাষ্ট্রের আকাঙ্ক্ষা তার পরিকল্পনা থেকে তুলে দিলেন। দুই, লেনিন বলেছিলেন যে “শ্রমিক, সৈনিক ও কৃষকদের প্রতিনিধিদের নিয়ে গঠিত সোভিয়েত-এর সরকার ছাড়া অন্য কোন সরকার আমাদের প্রয়োজন নেই” (“We don’t need any government except the soviet of workers’, soldiers’ and form hands’ deputies”)। লেনিন বুঝতে পেরেছিলেন যে ১৯১৭ সালের বিপ্লবের প্রথম পর্যায় মধ্যবিত্তশ্রেণীকে ক্ষমতায় এনেছে যে মধ্যবিত্তশ্রেণী অসংগঠিত। তিনি মধ্যবিত্তশ্রেণীর ক্ষমতাসীন থাকার পর্বকে সংক্ষিপ্ত করে তিনি সেই ক্ষমতা উত্তরণের পর্যায়ে চলে যেতে চাইছিলেন “যে পর্যায় ক্ষমতা তুলে দেবে শ্রমিক ও কৃষকদের দরিদ্র শ্রেণীর হাতে” (“Which must give power to the proletariat and the poor layers of the peasantry”)। অর্থাৎ ‘বুর্জোয়া-গণতান্ত্রিক’ বিপ্লবের যে সূচনা মার্চ-বিপ্লবে হয়েছে তাকে চকিতে ‘সমাজতান্ত্রিক’ বিপ্লবে রূপান্তরিত করতে হবে, জারের একনায়কতন্ত্র থেকে শ্রমিক কৃষকদের একনায়কতন্ত্রে—dictatorship of the proletariat-এ চলে যেতে হবে। শহরের মধ্যবিত্ত শ্রেণীকে বাদ দিয়ে শ্রমিক শ্রেণী, গ্রামাঞ্চলে কুলাকদের বাদ দিয়ে ভূমিহীন দরিদ্র কৃষকদের নিয়ে সর্বহারার অনিবার্য বিজয়ের কেতন উড়িয়ে দিতে হবে এই ছিল লেনিনের পরিকল্পনা। এই পরিকল্পনা প্রথমে অনেকের কাছে অসম্ভব মনে হয়েছিল কারণ অনেকে ভেবেছিল যে একবারে হঠাৎ করে সামন্ততন্ত্র থেকে সমাজতন্ত্রে যাওয়া যায় না। লেনিন তা করে বিবর্তনের ধারাকে সংক্ষিপ্ত করেছিলেন।

লেনিনের নেতৃত্বে নতুন সরকার তার গার্হস্থ্য ও বৈদেশিক নীতি ঘোষণা করল। যুদ্ধ থেকে সরে এসে শান্তি ঘোষণা, বিধ্বস্ত রণক্লাস্ত সৈনিকদের দাবি পূরণ করা, সমস্ত ভূসম্পত্তি রাষ্ট্রায়ত্ত্ব করে নেওয়া, শ্রমিক কৃষক সৈনিকদের নিয়ে গঠিত সোভিয়েত সন্মিলনে সরকার গঠন করা এবং এক কথায় প্রলেটারিয়েটের একনায়কতন্ত্র স্থাপন করা—এই সবই হল ঘোষিত নীতির অঙ্গ। লেনিন ঘোষণা করলেন “আমরা এখনই কৃষকদের হাতে জমি তুলে দিতে চাই” (“We favour an immediate transfer of land to the peasants”)। লেনিনের নেতৃত্বে শহরের শ্রমিক সঙ্ঘবদ্ধ হয়েছিল মধ্যশ্রেণীর সরকারের বিরুদ্ধে। গ্রামাঞ্চলেও কুলাকদের বাইরে গরীব চাষির ঐক্যে জানতেন যে যুদ্ধ চলতে থাকলে এই নতুন পরিকল্পনা চালু করা সম্ভব নয়। সে কথা মাথায় রেখে রাশিয়া ১৯১৭ সালের ১৫ ডিসেম্বর জার্মানির সঙ্গে ব্রেস্ট-লিটভস্ক (Brest-Litovsk) নামক স্থানে যুদ্ধ বিরতি ঘোষণা করে তিনমাস বাদে সেই স্থানেই জার্মানির স্থানে একটি দুর্ভাগ্যজনক শান্তি চুক্তি স্বাক্ষর করল। এই চুক্তির দ্বারা রাশিয়ার উপর কঠিন শর্ত আরোপিত হয়েছিল ঠিকই, কিন্তু রাশিয়ার অভ্যন্তরীণ বিপ্লব বেঁচে গিয়েছিল। লেনিন পৃথিবীতে যুদ্ধের বদলে শান্তির নীতিকে এইভাবেই প্রতিষ্ঠিত করেছিলেন।

২(খ).১৬ সারাংশ

১৯০৫ সালের বিপ্লব হয়েছিল স্বতঃস্ফূর্ত, ১৯১৭ সালের মার্চ মাসের বিপ্লব ও কিছুটা স্বতঃস্ফূর্ত ছিল। কিন্তু নভেম্বর মাসের বলশেভিক বিপ্লব ছিল সম্পূর্ণভাবে পরিকল্পিত। সমাজতন্ত্রবাদের আদর্শ, বলশেভিক দলের সংগঠন ও লেনিনের নেতৃত্ব, এই তিনের সম্মিলিত শক্তি বলশেভিক বিপ্লবের গতিশক্তির জেট। পটভূমিকায় ছিল প্রথম বিশ্বযুদ্ধ, যে যুদ্ধে মিত্র শক্তির (ফ্রান্স ও ইংল্যান্ড) সঙ্গে যুক্ত ছিল রাশিয়া। কিন্তু তা সত্ত্বেও ট্যানেনবার্গ-এর (Tannenberg) যুদ্ধে পরাজিত হল রাশিয়া। এখানে সেখানে ব্রুসিলভ-এর (Brussilov) মতো দু-একজন রুশ সেনাপতি অসিদ্ধিয়ার বিরুদ্ধে দু-একটি যুদ্ধে জিতলেও জারতন্ত্রের ভিত নাড়িয়ে দিয়েছিল প্রথম বিশ্বযুদ্ধ। রাসপুটিনের মতো ভ্রান্ত সন্ন্যাসী আর নষ্টবুদ্ধি জারিনার (যিনি ছিলেন জার্মান দুহিতা) প্রভাবে পড়ে জার সংকটের মোকাবিলা করতে পারলেন না। দেশের লোক ভাবতে লাগল জার গোপনে জার্মানির সঙ্গে স্বতন্ত্র সন্ধি করছেন যা তিনি করতে পারেন না কারণ মিত্রশক্তির কাছে তিনি চুক্তিবদ্ধ ছিলেন যে জার্মানির সঙ্গে কোন একক সিন্ধাস্ত ভিত্তিক দেয়া-নেয়ার মধ্যে তিনি যাবেন না। এদিকে রাশিয়ার গ্রামাঞ্চলে ছোট ছোট কৃষক, জমিহীন ক্ষেত মজুর ও প্রান্তিক চাষিরা সন্ত্রাসের পথ নিয়েছিল। সৈন্যরা রণক্লান্ত হয়ে যুদ্ধবিমুখ হল। শ্রমিকরা দাবি করল কাজের নানা সুবিধা, উন্নততর জীবনমান ও ক্ষমতায় অংশগ্রহণ। তৈরি হল শ্রমিক-কৃষক-সৈন্যবাহিনীর সম্মিলিত সোভিয়েত। মার্চের বিপ্লবের পর কেরেনস্কির সরকার এ সমস্যার মোকাবিলা করতে পারলেন না। লেনিন ফিরে এলেন রাশিয়ায়। বুর্জোয়া গণতন্ত্রের পথে না গিয়ে তিনি চাইলেন সরাসরি সমাজতান্ত্রিক সরকার, চাইলেন শ্রমিক-কৃষক-সৈন্যের হাতে ক্ষমতা তুলে দিতে। সাধিত হল ১৯১৭ নভেম্বরের বিপ্লব। প্রতিষ্ঠিত হল সর্বহারা মানুষের একনায়কত্ব।

২(খ).১৭ অনুশীলনী

১। দশটি বাক্যে উত্তর দিন :

- (ক) ১৯১৭-র মার্চ মাসের বিপ্লবের জন্য জারতন্ত্র কতখানি প্রত্যক্ষ ভাবে দায়ী ছিল?
- (খ) ১৯০৫ সালের বিপ্লব কি ব্যর্থ হয়েছিল?
- (গ) ১৯৩৭-র নভেম্বর বিপ্লবের আগে লেনিন কী মত প্রকাশ করেছিলেন?
- (ঘ) রুশ বিপ্লব পার্টির উদ্দেশ্য কী?
- (ঙ) ১৯০৫ সালের বিপ্লবের পরোক্ষ কারণ কী?
- (চ) ১৯১৭ সালের মার্চ মাসের বিপ্লব দীর্ঘস্থায়ী হল না কেন?
- (ছ) ১৯০৪-০৫ সালের রুশ জাপান যুদ্ধের কোন প্রভাব কি ১৯০৫ সালের বিপ্লবের উপর পড়েছিল?
- (জ) ১৯০৫ সালের বিপ্লবের পর সাংবিধানিক সংকট কী হয়েছিল?
- (ঝ) স্ট্যালিন কে ছিলেন? তাঁর সংস্কারের ফল কী হয়েছিল?
- (ঞ) ১৯১৭ সালের দুটি বিপ্লবের জন্য প্রথম বিশ্বযুদ্ধ কী পটভূমিকা রচনা করেছিল?

- (ট) ১৯১৭ সালের মার্চ ও নভেম্বর বিপ্লবের জন্য কৃষকরা কীভাবে পটভূমিকা তৈরি করেছিল?
- (ঠ) লেনিন সম্বন্ধে ট্রট্‌স্কি কী বলেছিলেন? তা কি যুক্তিসঙ্গত উক্তি?
- (ড) ১৯১৭ সালের রুশ বিপ্লবে বলশেভিক দলের কোন ভূমিকা ছিল কি?
- (ঢ) জেমস্‌টভোর ক্ষমতা সংকোচন কি যুক্তি সঙ্গত হয়েছিল?
- (ণ) বিপ্লব পরিস্থিতি নিয়ে যে কোন একজন রুশ লেখকের বক্তব্য পর্যালোচনা কর।

২। একটি বাক্যে উত্তর দিন :

- (ক) লেনিনের আসল নাম কী ছিল?
- (খ) বলশেভিক নামের উৎপত্তি কীভাবে হল?
- (গ) রাশপুটিন কে ছিলেন?
- (ঘ) দ্বিতীয় নিকোলাসের রাজত্বকালের সময় কী?
- (ঙ) তৃতীয় আলেকজান্ডার কবে রাজত্ব করেন?
- (চ) কোন জারকে সপরিবারে হত্যা করা হয়েছিল?
- (ছ) প্রথম বিশ্বযুদ্ধে একজন রুশ সেনাপতির নাম লিখুন।
- (জ) প্রথম বিশ্বযুদ্ধের পর রাশিয়ার সঙ্গে জার্মানির যে সন্ধি হয়েছিল তাকে কী বলা হয়?
- (ঝ) কুলাক কী?
- (ঞ) মুক্তিদাতা বীর কে ছিলেন?
- (ট) 'ইউকাম' কী?
- (ঠ) নিহিলিজম কীসের দর্শন?
- (ড) লোরিস-মেলিকফ কে?
- (ঢ) পোবেডোনাস্টেভ কে?
- (ণ) জেমস্‌ফি সোবোর কী?

৩। টিকা লিখুন (পাঁচটি বাক্যে)

- (ক) ডুমা।
- (খ) ১৯১৭ সালের মার্চ মাসের বিপ্লবের পর অস্থায়ী সরকার।
- (গ) ক্ষমতার হস্তান্তর সম্বন্ধে লেনিনের মত।
- (ঘ) ১৯০৫ সালের অক্টোবর ম্যানিফেস্টো।
- (ঙ) সোভিয়েত

- (চ) 'যুক্তিশীল উদারনীতি, সুশৃঙ্খল সংস্কারের সময়'
 (জ) '...সোভিয়েতের সরকার ছাড়া অন্য কোন সরকার আমাদের প্রয়োজন নেই'
 (ঝ) জেমস্টেভো
 (ঞ) উইট
 (ট) নতুন ক্যালেন্ডার
 (ঠ) কেরেনস্কি
 (ড) ট্যানেনবার্গের যুদ্ধ
 (ঢ) 'বিনা তত্ত্বে নিহিত সমাজতন্ত্র'
 (ণ) সামাজিক গণতন্ত্র বা সোস্যাল ডেমোক্র্যাট।

২(খ).১৮ গ্রন্থপঞ্জী

১. E. Lipson *Europe in the 19th & 20th Centuries*.
২. L. Trotsky *The History of the Russian Revolution* (translated by M. Eastman).
৩. M. T. Florinsky *The End of the Russian Empire*.
৪. M. Hindus *Humanity uprooted*.
৫. J. Stalin *Leninism*, Vol. 1
৬. S. and B Webb *Sovet Communism*.
৭. Lionel Kochan *The Making of Modern Russia* (Pelican Book).
৮. Jacques Droz *Europe between Revolutions 1815-1848*.
৯. Charles Downes Hazen *Modern Europe upto 1945*.
১০. S. Reed Brett *Modern Europe 1789-1939*.
১১. D. M. Ketelbey *A History of Modern Times from 1789 to the Present Day*.
১২. David Thompson, *Europe Since Napoleon*.
১৩. V. Alexander *A Contemporary world History 1917-1947* (Progressive publishers Moscow)
১৪. Norman Stone *Europe Transformed (1817-1919)*.
১৫. J. A. S. Grenville *Europe Reshaped 1848-1878*.
১৬. Sir B. Pares *Russia and Reform*.
১৭. E. H. Carr *History of Bolshevism (Vol. X & XI)*.